



1051



1051

1051

道光庚戌秋日



標里待年

淮海素光第題



道光三十一年庚戌  
梁於嘉興縣齋

梅里詩輯序



誥授奉政大夫台州府海防同知嘉興縣知縣朱緒曾撰  
梅里詩輯者嘉興海會里人之詩也徐碩至元嘉禾志大

彭嘉禾嘉禾縣梅會里人私語王店鎮有工部

尚書嘉禾縣梅會里人購屋於梅溪聚貨貿易

因名嘉禾縣梅會里人店尚書公字曰令安孫曰延福皆成進士簪纓相繼

王店嘉禾縣梅會里人嘉興縣南三十六里朱

竹垞嘉禾縣梅會里人典彙書亭在馬王文簡公竹垞南歸詩有梅里幽

棲之句金註引仲雍葬梅里惠註引吳城梅里平虛皆未深

考嘉禾志樂郊私語故未免誤解靜志居詩話云歲己丑移

家梅里亦名王店或曰晉時鎮邊使王遠居此或曰宋尚書

居正之宅或曰元學士綸也采里人王鏞王鈞以下二十家

梅里詩輯序

一

入明詩綜鏞詩云吾家舊住梅谿上以為王店著名之證晚

年欲修梅里志尤拳拳於里人著作編輯未竟余所見楊未

孩梅里志李蛻庵梅會詩選皆因竹垞之稿以成書也道光

戊申余自海昌移宰嘉禾因事至梅里愛其風俗淳厚里人

皆彬彬禮讓慨然慕竹垞之遺風訪所謂彙書亭者而憩焉

桑濃竹萎醜舫半傾相與摩撫柱石談往昔詩事娓娓入聽

里人因告余曰乾隆中詩人許晦堂有梅里詩輯之作亦因

竹垞之舊稿廣為蒐輯較蛻庵詩選為更備余深歎竹垞之

不可作而猶幸梅里之文獻不泯也因議修彙書亭醜舫建

三忠祠而晦堂詩輯僅傳鈔之本尤不可不刻里人莫不欣

然樂之遂覓得詩輯稿本見贈余暇即披閱潛心抉擇刪其

繁蕪復得其所未采者十數家按時代以增入屬孫君次公

讐校付梓其得詩人三百三十二家得詩二千四百七十一首分爲二十八卷里人多以編輯之名屬於余余謝之曰晦堂以三十年精力成此編余何敢掠其美耶惟余所增入管見所及者加按語以別之可耳原本每家不滿五首者爲輯餘今悉依次纂入不復另標門目以省繁碎夫梅里一鄉鎮耳得竹垞領袖風雅而詩人衆多遂如此然非晦堂之編葺則竹垞而外亦多淹沒不彰非里人之能談先達珍藏稿本余又何能知竹垞未竟之志得晦堂而始就使梅里詩輯不公諸世雖博如惠定宇者猶不知梅里之在嘉興又誰知嘉興梅里詩人如此其衆且多耶然則是編之刻成不亦大慰乎竹垞之志乎後之人得以觀感而興起者又將何如乎道光三十年歲次上章闡茂相月旣望序於拳石山房

梅里詩輯

序

二

梅里詩向有李奕庵梅里詩鈔李遜麓梅里詩人遺集李說庵敬堂梅會里詩選諸槩本均不若許晦堂梅里詩輯之賅備沈君遠香攜以見眎適金陵朱述之師莅治嘉禾因乞鑿定汰其詩之繁蕪者增李世科以下詩十餘家竹垞秋錦雪堂諸家重選一過多取其有關於吾鄉風土者釐爲二十八卷屬編校付梓間附管見於卷尾晦堂自著詩選入續詩輯中又著有春風錄與李金瀾天香錄均於里中文獻足資考證俟卽商付手民以備遺聞之采輯云道光庚戌秋七月秀水孫灑次公氏跋

參閱姓氏

嘉興沈維鑄小湖

鎮海姚 燮梅伯

平湖朱壬林小雲

嘉興沈愛蓮遠香

歸安徐保字阮鄰

山陽秦光第次游

嘉興錢泰吉警石

秀水于 源辛伯

秀水錢聚仁味根

吳江沈日富南一

海昌應時良笠湖

海昌蔣光煦生沐

桐鄉沈炳垣曉滄

海昌李善蘭壬叔

歸安奚 疑虛白

海昌蔣世焞吟舫

長洲陳 奐碩甫

海昌張 均湘石

平湖黃金臺鶴樓

秀水陳若蘭覺生

平湖俞 銓芷衫

秀水汪元慚少倫

梅里詩輯 參閱姓氏

二

平湖沈 筠浪仙

嘉興方維祺蓮卿

上海王慶勳叔彝

秀水高均儒伯平

吳江仲 湘蘭九

海鹽吳廷燮彥宣

秀水計光炘曦伯

石門徐薦謙亞陶

嘉興王逢辰芑亭

桐鄉馬蘭芬蘅垞

海鹽楊文蓀芸士

桐鄉周官勳朗亭

上海李曾裕小瀛

秀水陳茂垣小浦

華亭張鴻卓嘯峯

南匯張文虎嘯山

金山錢熙輔鼎卿

金山錢熙喆保堂

梅里詩輯目錄

卷一

元

王綸

明

王鏞

王鈞

李淳

李世科

李世和

李芳

李朝縉

李有光

李貞開

李應徵

李正華

卷二

李衷純

鄭士奇

李士標

李自明

胡碧霞

繆師伋

顧玘徵

朱茂曙

屠明簡

李寅

褚醇

蔣人

梅里詩輯目錄

李麟友

吳拱辰

卷三

王翊

卷四

朱一是

范路

卷五

屠曠

屠廷楫

徐貞木

杜涓

胡山

卷六

周箕

許箕

鄭公元

王選

卷七

王之梁

繆永謀



卷八

國朝

王庭

蔣薰

卷九

李明睿

郭良采

杜臻

朱昇

吳源起

屠焯

徐榷

史宣綸

史翼經

賀戍駒

吳惺

周笙

朱奎

張光祖

卷十

徐在

李光基

李鏡

鄭珩

沈道

鄭超宗

鄭起宗

沈遠

李我郊

王莫

梅里詩輯

目錄

卷十一

沈進

李繩遠

卷十二

朱彝尊<sup>上</sup>

卷十三

朱彝尊<sup>下</sup>

卷十四

李良年

卷十五

顧可緯

李生佳

范京

范風仁

涂允陵

褚越

陳興光

王復旦

王棚

王俠

方沁

王援

錢介枋

徐剛振

陳思光

陳恕

夏雨金

何奇

戴天培

毛士英

王怡

王登沆

褚體仁

褚鳳翔

褚平世

李

李

吳

卷十六

李

李

吳

卷十七

王芬

杜致遠

李符

褚士標

朱彝鑒

繆其器

吳源達

吳源達

王金鉉

陸輅

王天穎

程應元

徐允儀

陳昂

王

卷十七

周

周

褚于巡

褚振

徐寅

李錢琇

許肇位

蔡耀

梅里詩輯目錄

三

朱願為

周昱

潘啟明

張晃

沈維祀

夏明良

陸燮

王處厚

卷十八

朱昆田

李潮偕

林之枚

浦越喬

陳景泉

王金佳

方標

褚言

馮士誦

杜縉

杜其召

杜彥超

卷十九

顧仲清

李可願

李毓新

吳陸雲

沈良詒

沈登

徐行健

錢是式

李如蘭

李登瀛

史克泰

吳端木

吳天水

史先震

孔升

張費源

金介復

陳鳴鏞

時籛

張韶

李允銓

李兆鉞

李鏞

徐斌

徐燦然

倪譽

戴晟

張樞

王城

戴瑀

黃之楨

吳之鐸

周岳

鄭穀

卷二十

戴錡

沈翼

繆啟武

王滋

鄭邁

周臣

金大海

李成大

屠金鉉

李宣

胡璉

胡瑛

胡廷銓

吳讓木

吳大木

許國

沈珽

卷二十一

李宗渭

許雲龍

朱昌辰

朱暎辰

梅里詩輯目錄

沈士諤

姚模

徐錫履

張浩

張淳

張濠

王咸甯

戴彥鎔

戴公鋤

卷二十二

朱琪

朱鼎元

陳志翼

徐掄元

李岱

徐吉甫

李菊房

朱稻孫

金志聖

張原寅

周啟

周昶

姚虞潢

徐詩

徐士行

顧父衡

李開蒔

朱琛

朱璣

楊芳

卷二十三

繆元英

卷二十四

徐懷仁 許雲鶴 張桐 張簡

王夢珠 李燦 李傑 李之械

屠攀 李宗仁 郭維城 郭維垣

鄭其聯 陸維垣 程肅 馮鏜

馮崑源 夏啟賢 郭麟徵 祝文洽

李光國 李嗣雯 張年 王榮

卷二十五

李宗潮 楊為裘 周璐 朱振祖

陳湛 許煌 朱翰宣 許焜

尤錫九 王湘 李棟 徐林葵

徐六焯 楊汝霏 陳中 吳允茲

鄭壽昌 鄭以甯 董聖琳 崔文隴

梅里詩輯目錄

五

鄭履仁 周岐昌

卷二十六

王鴻宇 李知敬 李炎 李振鷺

李原 李浩 許煥 丁維甯

馮渠 徐懷永 邵祺 邵復庵

許崑源 樊廷講 程日華 李枝復

李燧 繆忠次 李宗禮

卷二十七

陳其源 張璉 王燮 周崇敬

鄒慕汲 楊漢籌 李且華 李復齡

李四維 鄭融 錢忠發 陳蘊生

朱根義 張孝瑜 徐師照 楊漢杰

李 鎔

李崇忠

王肇昌

陸人法

王元珠

以下闕秀

王 荃

吳 巽

蔣永瑞

李茂蘭

李祥芝

通 門

以下闕方外

智 遜

行 篋

行 傑

心 印

尊 法

因 培

宏 徹

超 源

一 班

行 彌

清 潤

審 淵

定 嵩

覺 慧

超 崇

沈 存

女僧行剛

梅里詩輯

目錄

六

王綸

綸字昌言以字行元至元間官嘉興路學正

晦堂詩話郡邑各志載有王綸柳橋漁唱二章註曰  
禕子義烏人至景德寺詩不註籍貫又考鐵網珊瑚  
題墨菜詩款曰嘉禾王綸其為學正之作與否均不  
得而知矣

朱緒曾按義烏王禕止一子名紳不名綸有繼志齋  
集十二卷無柳橋漁唱詩宏治柳太守府志載王綸  
柳橋漁唱亦不云禕子且與楊維禎劉基同詠其為  
元末所作無疑近人郡邑志注禕子者誤今編昌言  
詩仍當收入又於趙維寰海昌備考得雙忠廟詩二  
首前此仍有宋尚書王居正元學士王景楷詩不傳

遊景德寺分韻得又字

釋智寬序曰至正辛丑秋七月十有三日永嘉曹睿  
以休暇出西郭憩景德寺諸公攜酒相慰籍環坐而  
飲以唐人因過竹院逢僧話又得浮生半日閑之句  
分韻賦詩雲海師哀集成什以誌一時之良會云

梅里詩輯

卷一

一

驕陽秋逾炎屢居苦囂陋出郭謝塵鞅浩氣溢宇宙祇園蔭  
長流松篁倚天秀簪履適相從萍水欣解后主人延客坐芳  
情重醇酎道合猶通門志洽儼交舊緬懷風塵際東西困羈  
走餘生獲良會歲月不可又願言慎所止同心契蘭臭日薄  
嗟易昏明當觀晴晝

柳橋漁唱

楊柳青白鷗不來烟水昏落日乘風放船去顛倒醉眠包乾  
坤君不聞西家急科糶東家重築城越上良田無主尋我漁  
歌發兮君爾聽黃金何似一絲輕

楊柳黃秋風一夜蘆花鄉漁釣靜志周日月公卿不換漢桐  
江君不聞大官呼領兵小官亦戎行天涯歲晚多風霜我漁  
載歌兮情慨慷鑑湖容借賀生狂

題梅花道人墨菜  
食齋腸獨苦食肉衆所鄙終當狠以嚼罔俾私欲累

海昌雙忠廟

親將已柄授巡兄卻向軍中稟令行此事便應千載祀兒童  
休向問功名題許公

一死於心果不難曹柯心在炳如丹空留矢著浮圖上誰不  
教渠滅賀蘭題南將軍

王鏞

鏞字聲遠洪武庚戌舉人官翰林院編修

詩話吾鄉溪曰梅溪里曰梅里匯曰梅匯編修詩吾  
家舊在梅溪上則名之由來久矣編修築梅花莊梁  
孟敬石門集有題嘉興王氏梅花莊詩今已莫考其  
處矣

緒會按竹垞徐一夔傳當元之季一夔自天台徙嘉  
興於時嘉興人鮑恂居郡城之西溪貝瓊居千金耳

梅里詩輯 卷一

郁遵居南陳村朱克恭居澄林王鏞及弟鈞居梅溪  
濮仲温父子居濮市豐于資集一時名士爲聚桂文  
會以文卷赴者五百餘人請楊維禎評其優劣其聚  
桂文會詩想不在玉山草堂之下惜不可得見

水竹居爲朱克恭賦

碧水澄潭自作洲琅玕多種屋東頭旋燒新笋安茶竈時斫  
嘉魚踞釣舟客至罷邀明月飲人間何必五湖游吾家舊在  
梅溪上遙憶清風度早秋

王鈞

鈞字天全鏞弟

詩話編修兄弟有合刻詩稿而不能永其傳并蔣布  
衣楚樺采入詩乘者亦不可得僅從詩綜各得一篇  
蓋鈞自水竹居卷中者

題水竹居

文采風流偶晉賢由來蹤跡託林泉候門童子清於鶴留客

軒窗小似船錦鯉寄將書咫尺綵鸞飛下月嬋娟何時把酒  
同燒筍卻訪東坡笑涓川

李淳

淳字元厚號東巖嘉郡貢生海鹽人遷梅里正德中

以子世秩貴贈文林郎武甯縣知縣有一篋山房集

詩話文林世居鹽邑之呂家父景孟字宗浩景泰甲戌進士歷知莆田甯化二邑擢監察御史有直聲忠國公石亨侍奪門功請乞無厭疏請裁止不聽引疾歸編明正音七卷行世文林年十三而孤長爲梅里王明府廷宰贊堦遂家焉於舍後累土爲山有亭館花木之勝人是以小朝川目之子孫世居於是今所稱假山李氏是也

梅花歌寄懷伯兄容庵

去年梅溪溪上月照耀梅花開似雪今年江北雪正飛空憶

梅花月華白月暗山城會復明梅落鄉園已銷歇夜夜綺窗

梅里詩輯

卷一

三

入夢遙千樹寒香沁人骨一笑相逢萼綠華攬衣欲別難爲  
別醒來卻想茅屋人心跡儵然兩幽絕焚香掃地一事無紙  
帳春風坐清越惆悵征衫脫未能明年驛使猶煩折

讀先世遺集書後

吾家本仙李自昔數清門兩世詩名遠千秋手澤存力惟追  
正始體自陋西崑雒誦忘深夜檐花落酒尊

登顧况讀書臺

一自伊人去芳菲絕可哀况詩日日兮春風芳菲兮欲歇寒蛟潛古穴殘碣

沒荒臺解葉連山暗烟帆極浦開昔遊曾點筆重拂舊莓苔

秋柳

津亭一回首搖落滿江干漢殿空思切龍庭欲寄難驚霜鳥

影亂吹月笛聲寒何處章臺是淒涼不忍看

貽王青上

住

遠移半邏村邊糴來往梅花溪上洲泉石久同元亮癖溪山  
眞作輞川遊余於舍北積土爲山上植卉木綴以書堆鄴架  
亭榭頗有巖壑之趣人呼小輞川云書堆鄴架  
兒堪讀酒壓糟牀婦可謀惟汝柴門來往數遂成二老亦風

流

大漸池上作

別置間園傍曲池池邊宛轉結茅茨杖藜十日不歸去開遍  
白蓮人未知

過審山道院

小雨閒階細草生石闌斜透夕陽明一聲清磬客初到檨葉  
滿山山鳥鳴

李世科

梅里詩輯

卷一

四

世科字登之號南崖貢生官江西武甯縣知縣

緒會按南崖爲東巖先生之子少開悟喜博覽尤嗜  
春秋左氏傳在官多善政縣西有水月亭踞龍潭石  
罅風景清絕公餘與二三名士觴詠其上旣而曰以  
五斗米折腰不幾爲淵明所笑遂乞休土民號泣攀  
轅有追送百里外者著有南崖集自南崖以下增李  
氏詩十家俱從李茂才善蘭家集中得之

題遊仙圖

了髻插三花蜺旌夾道遮迢迢一黃鶴飛上太清家  
太清高不極星辰手可摘俛視渺八荒一氣但空碧  
碧空久翱翔紅輪起搏桑僊人有樓閣宛在水中央  
中央萬頃波樓船在何處一聲鐵篴吹海鷗散如雨

李世和

世和字節之號鶴洲貢生官魯王府典膳

緒會按鶴洲爲南崖之弟淹貫經史有二難之目魯  
王故豪侈讎飲無度公于供億每多裁抑王素重其

名多曲從之作詩力追漢魏於樂府尤擅長遺集失傳藝林惜之

### 五雜組

五雜組烟花陌往復還團圓月不得已風塵轍  
五雜組蘇武節往復還趙家璧不得已賈生策

李芳

芳字叔承號繼泉嘉靖壬子順天舉人壬戌中會試

乙丑成進士知曲周縣移江陰遷饒州府同知

詩話郡丞爲令有惠政居鄉有厚德林栖四十餘年詩牡丹百餘種著譜以續歐陽工山水花卉入能品

### 釣鼇磯行

君不見南湖之水淨如洗琉璃萬頃銀濤起不作陽侯瀕洞  
波百川暴集天吳喜水深波闊勢轉雄蛟龍往往蟠其中日  
出月沒彈丸子朝雲暮霞青朦朧此中簫鼓未曾已粉黛鉛

梅里詩輯

卷一

五

華如列綺何處樓船游冶郎紛紛錦瑟盧家女中流突兀做  
樓臺倚檻憑陵八極開扶桑若木渺無際碣石空同僅一坏  
臺下威夷一片石恍疑萬里來龍伯俯瞰蒼茫烟雨多遙看  
激灩鼇鼉出此時任公跼踏層何安敢求盈尺龍伯見之  
心歎息持竿理釣盃溟渤手持數年猶未得一朝翻浪起長  
髻海沸川騰天地黑始信鷓鴣榆枋知人間果有鷗鵬翼試  
問此磯築者誰云是太守龔公爲龔公爲政多豈弟政成偏  
有臨淵思但愁此磯築已成神鼇夜泣還咨齋君不見昔時  
五神山飄泊蕩無處帝命十五鼇戴立屹不去大人一舉連  
六鼇方壺員嶠今安厝瞥見龔公新築磯三山之神盡吼怒

李朝縉

朝縉字子推號新泉萬曆癸酉副榜官江南涇縣訓

導

緒曾按涇縣山陬荒僻人鮮知學先生盡心勸督先  
實行次文藝士知淬勵風尚為之一變云

七夕兩感賦

綵樓故事誰相問  
徹夜顛風雨復侵  
應是天公惡機巧一時  
兒女罷穿鍼

悵望經年始一過  
平明依舊隔銀河  
始知天上離人淚  
比似人間灑更多

李有光

有光字心鶴諸生贈揚州府學訓導

緒曾按心鶴為鶴洲先生之孫學有淵源詩宗少陵  
不自愛惜脫稿輒為人持去故遺集無存

賀海州吳侍御

南國蜚聲早  
天朝寵渥新  
烏臺霜夜月  
驄馬玉京塵  
意氣動

梅里詩輯

卷一

六

山岳精誠泣鬼神  
卽看丹詔下四海  
藉陶鈞

李貞開

貞開字叔泰號華庵貢生官江西太平縣訓導改會

昌縣知縣

緒曾按先生自少以尚書名家江南學者多宗之為  
司訓啟後學津津不倦大僚屢薦擢縣令為政  
勤明嘗詣各鄉驗民貧富及丁稅多寡第為上中下  
籍記之遇有徭役按輕重使之值歲大饑亦卽按籍  
以賑他邑多遺濫公獨無之內官奉命採辦率凌逼  
誅求供億良苦公獨不為動內官畏其強項民賴以  
不擾性耿介不名一錢時有天下清官李會昌之諱  
著有北征焚餘涉江燕游姑熟銷暇等集

西征曲

去年西征大點兵  
將軍鼓樂出皇城  
健兒十萬蔽原野  
叱咤四顧風雲生  
傳說三軍倚三箭  
長驅奏凱天山平  
今年軍書疾於電  
邊鄙徵兵到鄉縣  
爺娘哭子兄  
哭弟死別生  
離眼中

見玉關一去魂夢遙驚沙黯淡風蕭條千年瀚海波猶黑六月飛狐雪未消令嚴四野人語寂天陰往往鬼夜號軍中幸有霍嫖姚羊召且隨邊月開弓消君不聞李北平數奇萬里徒橫行又不聞蘇屬國埋沒胡塵頭雪白只今奮身擊大荒願如虓虎驅羣羊功成不願圖麟閣但借明駝歸故鄉

### 李應徵

應徵初名萬山又名衷毅字伯遠號霽巖萬曆癸酉

應天舉人選臨安教諭陞國子監博士有藿園詩存

詩話嘉隆之際于鱗元美弭主吟壇海內靡然向風博士稍後出及與元美遊而不爲苟同獨以清羸之氣行其卓越之才五言多鮑謝七古酷肖青蓮近體多師爲師凝清振麗今樂府志感絲篁氣變金石允推作手自時厥後秋槐蠅起羣英輩出流風餘韻迄今不衰吾里聲詩之盛實自博士翔始其選壽州也友人有一未及選者旅食且乏請於主者以壽州讓之論事有氣節見時事日非繳昂感慨發於詩歌爲

### 梅里詩輯

#### 卷一

七

忌者所劾姚處士士彝贈以詩篋中詩亦稱知己爲送詩名到至尊沈司馬思孝和云許大詩名聞帝座華陽社裏益推尊後其事得不問

### 善哉行

來日苦少去日苦多對酒不樂愁將奈何

歡不及身而憂後人遐哉莊生逍遙采真

膠漆匪固金石匪堅自非王喬何以永年

明月當戶皎皎夜光有客在堂有酒盈觴

樂不可再別易會難願言自愛努力加餐

眷彼五嶽可以遊嬉參駕飛龍仙以爲期

### 古怨歌

淒淒白露朝不及暮故不復新新當復故

### 採蓮曲

擘開芙蓉花的的見蓮喜誰知空房中無從覓憐子  
折楊柳歌

楊花白於雪空中飛作絮女兒顏色好不遣郎家去

企俞歌

腰間金僕姑跨下鐵襴褕生縛野馬駒射殺兩黃羊

青陽度

門前楊柳枝漫天作飛絮花是路傍花樹是儂家樹

休洗紅

休洗紅洗多不堪服新紅裁衣豔人目舊紅作裏稱腰腹人  
情反覆君所知君心冷煖妾自思

轉餉行

轉餉若轉蓬哀時命獨丁苦生長中主駕輕舸策肥馬東征

梅里詩輯

卷一

八

累歲幕府下令如火南檄吳越北燕與齊魯轉餉滿天下安  
得自言苦陸度遼陽水集漢江朝符發樓船夕符駕車馬弓  
雖長焉能射扶桑軍行淚下如雨使我生別離死不復歸來  
近發析木遠涉山海從軍苦饑轉餉多悲山有豺虎海有蛟  
螭豈不爾思我行諒不得與子同歸下淚溧溧雪涕纍纍船  
敗柁折車做馬羸且勿言還遠望朝鮮渺若隔於九泉我駕  
船汝駕車海行度船山行度車將是船車到彼如家船車中  
覆饜至者少待餉者多初若不足後更有餘非餉有餘卒伍  
半虛亂曰懸軍與夷相持人不得食馬不得芻萬里轉餉非  
計枵腹難以久居

浮海篇

沈沈海中石飄飄井上梧我本江南人北徵赴海嶠譬彼風

轉蓬吹墮無根株海水何蕩蕩萬里少邊隅島嶼非夙經風  
色且暮殊瞬息倏千里浹旬滯脩途魚龍隱鱗鬚髯浮天  
吳魚目若明月怪樹撐長鬚吹澗倒百川呼吸吞舳艫揚帆  
析木津掣洩三韓區此身非長年橫海枉見呼常恐同魚鱉  
畢命沈黃壚二月發旅順五月未玄菟同來百千人半冒岑  
毅枯仰天長太息緬想懷故都生未越里門浮海征倭奴

採金謠

日得百斗砂安得金滿車夜聞萬家哭安用金作屋殿上遺  
火山中掘土柏梁災終南苦

權采謠

多費少獲縣官一私家百

諺語

梅里詩輯

卷一

九

鬪不如坐坐不如臥

春日雪後過鹽官宿安國寺曉起仍雪登閣賦此

高閣曠神目積雪明空林海天有餘映巖阿足重陰回焱激  
素輝飄颻故難任歸鴈戢寒羽嗷嗷多哀音悠然念遠道望  
之何浩浩憂思良在茲春風苦不早義馭忽東升青陽絢遐  
暘淑氣散滌寒流滋被野草所嗟巖威列旦日不可保人生  
百年間安得常美好適意在逍遙藏身以爲保

遊張公洞同吳惟中俞公臨諸子

夙志在巖壑薄言命吾黨晨策無近尋夕揆有幽賞茲洞信

奇變乃在諸山上昔傳赤烏間雷霆忽中響靈秘一朝開乾

坤自成象我來恣極覽振衣苦長往捫險多壯心眷奇發遐

想始至覺嶇嶇稍入益深緬沈冥失天地圓光晝莫顯叢燎

寶

探  
音探

若

道我前扶杖信游衍怪石幻諸形迷昧竟誰辨丹竈火欲燃  
石田水猶滿躡磴屢高深綠崖亦迴轉隙中露微光遙知是  
前峴舉眺漸披豁遲徊力忘蹇企石挹蔥蒨臨流涉清淺意  
愜情彌深理得物自遣落日憺忘歸孤雲沒層巘

曉發破石

昨夜宿長水今旦踰破石明星高欲墮晨光正東白俄看曉  
日曠復見朝霞赫驚風拂蘭渚崇雲駭荷澤肆日沙林際沂  
流極川脈時序感茲今浮名媿前昔空負郢人音徒懷趙氏  
璧憂思欲何爲鬱鬱傷心魄羨彼臨風蟬高機安所迫

答董君謨

平生抱奇氣志意多慨慷中歲不得意策蹇還故鄉昔爲韞  
上鷹奮翮摩太蒼今爲轅下駒伏軛困羊腸舉目局四海徒

梅里詩輯

卷一

十

然守空堂懷中雙白璧媿非黃金裝至寶不自炫負此和氏  
光榮寵非所希貧賤何足傷百年未云盡千里詎可量灼灼  
桃李花當春吐芬芳何如松柏姿落落凌秋霜夫君信高節  
百尺非尋常偃蹇嘆魚服軒舉思鳳翔努力各自愛毋爲涕  
沾裳

登堯峯山展眺

吳會信名區茲山足幽賞伊余秉微尚探奇成獨往入徑始  
縈紆捫蘿忽超恍絕磴履危嶮嶮僧寮坐虛敞憩石漱泉流振  
筇答松響遂升層崖顛邈若烟霞上雲物相媚映波瀾亦泱  
泱言鳥喧密林驚鳧亂芳蔭落日湖上來巖光自駘蕩展目  
非一觀會心有萬象俯仰意彌申頽然醉春醴願息區中綠  
毋爲局塵鞅

秋懷

北風號中林，林葉萎以黃。嗷嗷孤飛鴻，野外啼嚴霜。攬此意，不適愁思結。中腸出門四顧望，西風吹我裳。囊空乏一錢，舉動無輝光。歸家百憂集，不如在他鄉。繁華久零落，習習秋蘭芳。幸有盈尊酒，可以解憂傷。

八月十四夜赴沈中丞純甫約與范倩東生泛月之茗  
上

顏照忽已匿，閒夜增離情。涼風扇薄帷，白露塗中庭。詠彼蟋蟀，唱眷言懷。友朋佳期及，三五圓景將。漸生素書忽，見招招攜戒宵征。方舟鶩修渚，溯洄遊前汀。薄烟斂層霄，皎月雲間升。驚鵲旣飛遠，來鴻亦哀鳴。流輝照衣裳，坐見秋江澄。爽氣蕩瀾澳，沖魄涵虛明。屬林方候滿，委照知戒盈。且勿論居諸，梅里詩輯

卷一

十一

杯酒聊共傾，芳洲思紉蘭。極浦聞采菱，長嘯當絲竹。山水含清冷，不寐望所歡。悠然見菰城，冰玉敢自喻。金石故可憑，良覲在明發。庶以慰深盟。

吳門逢袁履善先生卻贈

涼風起蘋末，落日開中園。寒蟬聲嘒嘒，飛鳥何翩翩。顧逢雲間叟，而同江上言。我昔與君別，遠涉長水原。今日復見君，乃在吳閭門。閭門鬱雲興，流焱激飛軒。攜手登茲樓，時以散憂煩。明月皎夜光，有酒盈我尊。開尊飲君酒，寸心聊復論。丈夫重意氣，迹遠道自存。何必齊年齒，然後情誼敦。願將結佩贈，媿無雙瑜璠。

寄御史大夫沈公純甫

誰謂芝桂芳，指作施與齋。誰謂西施妍，而不如宿瘤。姬公避

流言孔父蒙麋裘豺狼嗥麒麟鴝雛笑鵲鵲鳳德故不衰仁  
物竟奚尤應龍游赤霄甯與螻蟻讐天王自聖明魁颯潛見  
搽杯蛇祛獨疑市虎釋衆咻睿鏡有餘照慈杼無妄投明良  
嗣虞徽魚水嗣漢猷亮懷百鍊操繞指非所謀勿以入室故  
競彼戈與矛讒口任叟叟鎮之以休休懸崖少停泓徹淵寡  
長儻泰山摩蒼天不辭垤與邛滄海百谷王涓勺鮮棄流桃  
李故不私藥籠亦見收觀彼豫章木安得無旁樛扶疎于青  
雲風雨豈復憂清夷闢周道浩蕩浮南舟交親誼所敦申言  
副咨諏

題清音閣贈朱君采

君采天下彥乘時奮遼廓身雖在軒冕志不忘巖壑朝謝桓  
氏驄暮羅翟公雀結樓臨青苔愴焉守玄漠一水旣當戶衆  
梅里詩輯卷一  
山亦羅郭俯瞰激清冷仰臨矚崖巒曠然招遠風蕭疎振林  
薄并入山水間情境兩寂莫無乃草玄亭不亞燃藜閣校書  
豈云疲解嘲當歡譁緣尊時時開清言復間作心期契鴻冥  
世變付龍蟻達人操其權神理或可託

秋夜歸自茗水泛月鶯脰湖寄沈子勺

朝辭若下城暮驅笠澤編景物忽已改川原亦邈緬娛目惟  
清暉百里同一眇月出梅堰高水落松陵淺曲渚屢縈紆環  
洲迥迴轉澹澹波生烟遙遙雲沒峴楓林霜欲丹蒹葭露初  
泣境會心自恬神曠理逾顯同懷寄秋水離念得所遣

南池述懷同胡孝轅沈汝納

維舟濟城下置酒南池邊池水吹綠波澹澹生春烟青蒲披  
長堤白露洄旋淵柳色衰露深雲氣澄空妍幽襟豁茲覽緬

想寄前賢詩碣摩杜陵酒樓挹青蓮至今池上酌宛在滄洲  
間兩公昔放逐夢寐常周旋旅食秦州道羈臥潯陽年一時  
感顛悴千載參微言寂莫身後名乃奪造化權念此涕橫流  
三復攬遺編

石湖秋晚泛舟望天平諸山

秋色淨無際霜氣澄寒空何許秋較多斜陽在丹楓披離翠  
微閒綺錯高霞封螺黛懸夕波天鏡摹清容又如拭吳鉤倒  
割青芙蓉片雲湖上歸翳然生遠峯山中有明月卻與前浦  
逢夷猶寄遐心臥聽雲谿鐘

述感

旭日不照地慘黯東南隅陰風西北來遂與浮雲俱昏曉不  
復辨晦冥忽須臾雷霆擊高空雨雹集堦除皇澤亮已竭天  
梅里詩輯 卷一 三

威甯所須戾霄無逸飛逝淵寡潛魚貂璫構禍患豺虎當路  
衢宇宙雖云邈吾駕將安如

武夷吟爲叔平姪賦

浙水猶未渡閩山安可越夜夢武夷君幔亭弄秋月顧余莞  
爾笑相攜扣丹闕薛荔飄衣裾芙蓉墮冠髮吹愁落空際步  
虛任超忽陡覺聞天雞明星高兀兀九曲杳然失對汝清興  
發安能涉世網生死遞淪沒何當乘飛霞揮手謝仙骨

舟過松陵沈子勺邀同顧別駕王半刺諸公晏集作兼

呈長公伯英

扁舟遡廣澤蒹葭浩蒼蒼芙蓉被江堤間以秋蘭芳恍如覲  
容儀燿燿舒其光美人忽見招忝竊登斯堂余遊伯仲間常  
恐不得當匪云託肺腑所恃道誼長市交若春華改葉隨秋

霜苟能抱微衷乖離亦何傷所以一水間落穆如相忘豈謂  
山澤臞無意借巖廊跡遠心不遐斯意兩不妨樂哉此良會  
周親情所康肴來俱異味酒至無返觴新聲奏逸響妙伎呈  
中央主人詞壇雄樂府兼擅場曲誤必屢顧按節知宮商此  
中有妙理奚必非文章世多混真贗誰別否與臧吾將託優  
孟抵掌以徜徉

雜詩

所居雖壓市其後卽我園三周水繞之水流何潺湲灌木旣  
羅戶密篠亦當軒境近心獨遠悠然忘世喧夜枕鳴谿漁曉  
窗聞鳥言病不廢杯酒時時亦開尊適意不在醉聊託餘生  
存

人生歡日少戚戚恒多悲每憂此身沒身後無所遺所以百  
梅里詩輯

卷一

十四

年中役役無已時生時不行樂死復安所知墳墓且不保智  
愚豈所期及此有盡軀壺觴聊自持秋雨日以深秋草日以  
滋巖霜倏將至不樂欲何爲

觀吳山人畫山水圖歌

白紙半幅爲空天筆端一掃成山川心驚目亂如何想羅浮  
雲氣蒼梧桐懸崖絕磴帶秋色濛濛上與冥青連此中四時  
失晝夜長松萬壑空年年松下與客似來往臨流倚杖何翩  
翩不識此君爲阿誰無乃卽是金華仙金華仙人吳破瓢平  
生半臥谿山雲周遊如在丹青裏今日圖中疑是君

沈純甫先生起自謫所再晉符卿有贈

北風十月吹黃沙萬里寒空卷烟霧沈郎霄漢乘樓船雙旌  
飛揚伐大鼓看君意氣何其雄腰懸紫綬生英風拜列卿稱

尚璽承恩出入明光宮憶昔重陰蔽天闕么麼晝蝕炎精缺  
縱橫狐鼠遍城社豺狼磨牙競人血沈郎手提長劒獨大呼  
欲上青天截虹霓霹靂衝驅白日寒直使妖魄暗消裂天子  
不怒丞相嗔孤臣去逐羅浮雪九重一旦陰霾開陽春浩竈  
從天來夜郎不放李白死長沙爭羨賈生回紛紛當年媚竈  
者炙手不熱成寒灰乃知冰山亦消釋倏忽榮華安在哉何  
如沈卿直聲碎訇振千古廟廊還召非常才匣中寶刀光不  
改殿上折檻今猶在終看臣節冷於霜但憶君恩深似海聞  
說長安非舊時沈卿努力行勿遲

長水雨中送董君謨還四明

谿雲壓林林氣黑長河黯淡無顏色大舩驅來笠澤風一片  
歸帆雨中濕送君此去歸舊山東湖之水流潺湲四明崇峯

梅里詩輯

卷一

五

二百八一一峯尖如黛鬢董生蕭灑磊落之才亦如此對之  
可以開神顏我歌四明送君酒何惜相逢躉攜手便應喚汝  
作董糟邱酒池之中可拍浮盡掃爾我坎珂抑塞之窮愁丈  
夫意氣自有主爲蛇爲龍何足數無錢但須典鷓鴣有酒便  
能賦鸚鵡少年得意多挪揄卻笑乃公爾何苦仰天大叫白  
日徂腐鼠那可驚鷓鴣雛男兒世間何事不可作但不能以此  
七尺爲侏儒功名富貴可以赤手博摧眉俛首胡爲乎世人  
聞之皆掩耳董生之前可語此酒闌歌罷君發船我亦還家  
渡長水

武陵行贈張廣林

吾地舊稱梅花溪秦長水東境也俗素樸厚人多長  
者邇來士習於巧民習於僞淳謹之風殆與曩時異  
矣余友張廣林別號武陵豈有所感而託焉者乎予  
爲作武陵行

張生本是梅谿人何緣卻羨武陵春谿頭亦有桃花春來  
萬樹錦作霞自云非是避秦來但看谿上桃花開花開片片  
落紅雨漁郎來時我作主卻笑人間世態新相逢何必衣冠  
古張武陵有酒且莫醒李生與汝交莫逆爲君一曲歌武陵  
谿邊老梅含淺白何如武陵洞口桃花碧秦時尙有武陵谿  
卽今何地可幽棲君不見梅花谿

四明山歌贈吳門祝四

君不見四明之山高崔巍石窗豁然天際開徐鳧飛瀑下小  
蛟錯愕山光傾大雷二百八十峯插天驚濤怒浪排空來雲  
中樊榭杳難卽恍惚如見金銀臺祝生年少何白哲向人時  
稱四明客自言先世本四明當年來往姑蘇陌姑蘇結客輕  
薄兒青衫白袷春風時林間落卻金彈丸路傍折得楊柳枝  
梅里詩輯

卷一

去

卽今已作偉丈夫高齟闊面多赤髭自顧一身忽如此以茲  
不欲居城市秫田幾畝傍三更茅屋數間臨澗起春風湖上  
試木蘭夜月庭前落松子虎邨山色碧於苔何必丹山與赤  
水君不見李生笑傲卑王侯拔五嶽凌滄洲年過三十不得  
意不如且作名山遊與君埽卻四明石身臥雲南望雲北  
咄咄行

君不見搖山風吹飛雨急倚蘭殿前秋草溼君王英斷人莫  
知伏蒲往往愁難入鳴鴉晝鳴狐鬼嘯慘淡寒空欲埋照十  
載長肩鶴禁扉一朝忽啟龍樓道鴻鴿何煩傳羽翼閒殺商  
山紫芝老萬國歡聲動若雷旭日忽向長安來已見鸞旌臨  
博望更聞仙仗集蓬萊台星昨夜墮地死前曜今宵燭天起  
分土鼎建諸侯王當璧者誰獨元子雨露新增少海瀾風波

不動天潢水亦知萬壽慈顏開頓覺九廟神靈喜周昌木彊  
不解事當日期期亦何爲浮雲自深日自高冥冥那測蒼穹  
意從來聖心元不移兒曹咄咄空相疑

天目怪松歌

天目峯頭多古松一一怪狀如飛龍洞壑高寒石骨瘦苔蘚  
剝蝕雲氣封大者尋丈短者尺蒼鱗鐵幹咸擎空有時倒俯  
層巖出勢復干霄上烟日天矯還疑夜蛟舞屈曲更類潛虬  
蟄冥冥似得神鬼扶咫尺卻愁風雨入近來斧鑿曾屢經搽  
剔強半多奇形山空遂使猿鶴怨彷彿夜半愁山靈一株獨  
倚古庵後黛色參差結雲構孤生不爲千霜侵片石幸托盤  
根厚塵影時留講席陰偃蓋長向僧寮覆怪松怪松爾材旣  
不中梁棟施胡爲具此雲霄姿支離豈甘供世玩半死肯逐

梅里詩輯

卷一

七

枯桐爨

夢偃松篇

曉踏天目峯屐底秋雲飛夜歸山城宿枕上秋夢微夢中猶  
帶烟霞氣髣髴蒼烟落松際偃蓋亭亭扶怒螭飛龍矯若驂  
羣帝蒼鱗老榦不十尺屈鐵擎空勢非一參差低俯復高昂  
宛轉東盤更西出誰翦龍須一片齊平鋪翠作青厓席我欲  
乘醉松頭眠日落寒雲倒空擘便攜清尊坐其下萬壑秋濤  
向身瀉偃松歷歷夢中懸昨游翻覺猶茫然風雨吹魂驚欲  
起枕席雖在巒壑徙時聽塔前墜葉鳴猶似空山落松子

園樹爲風雨所拔歌

六月風吹谿雨急谿水欲上倒空立蛟龍勢挾風雨來冥冥  
似聞神鬼泣曉看濁浪向西注聞決滄溟隕隄入園中有桐

復有榆一夜風拔連根株孤松鐵幹獨無恙恍惚若有靈風  
扶東鄰老椿三四樹蔭我谿屋綠如雨去歲一株忽枯死已  
覺清陰減如許其一今年復風折安得扶疎覆鄰宇君不見  
錦江神樹被風吹杜陵老翁雙淚垂草堂顏色驟若失遂令  
無處吟新詩又不見龍鱗不改蒼然姿露桐更引生孫枝

新秋坐漪榭

雨餘林氣青七月秋水白檻外蘆葦洲水上雲霞席井梧烟  
泛宿雨晴谿樹尙作流雲聲七夕漸近河漢明暮潮欲落初  
月生

歸自虎林舟中卽景

扁舟乘興去又復是歸程三月桃花雨春江幾處平岸迴村  
不斷日落水空明遙想湖山畔年年芳草生

梅里詩輯

卷一

六

同馮開之登東日

碧巘欲摩霄青巘濟勝饒排空出鳥道盡日到僧寮谷隕飛  
陰瀑松寒起夜潮坐疑天界逼身與白雲遙

垂虹橋觀瀑

翠嶺鬱崔巍飛流去不迴虹霓千尺斷風雨半空來倒捲銀  
河落中分石壁開誰云擲地句偏許向天台

清涼山登眺因過雲峯上人房

地接人天近烟蘿隔世氛井梧深落照石竹冷高雲鳥外長  
江盡杯前萬壑分願陪蓮社末仙唄六時聞

人日峴山遣興

人日人爲客春風春可憐烟波浮宅遠邛壑寄情偏栢葉烏  
程酒椒盤下若編如從習池飲醉臥峴山前

秋江夜泊

木落疑秋雨寒江增夜波青山移棹遠明月逐帆多近岸投  
漁火遙汀出榜歌還將故園夢千里寄烟蘿

送沈純甫謫嶺表

朝陽有鳴鳳生死獨批鱗憂國千年淚投荒萬里身嶺雲昏  
落日江雨度孤臣此去湘潭上芊芊芳草生  
謫去君何恨臨行解佩刀一身甘鼎鑊萬里涉波濤嶺戍風  
烟直炎天瘴癘高天王自明聖行矣莫辭勞

歷陽

聖祖開基日淮南卽舊邦六龍飛采石萬馬渡橫江豪傑爭  
挑戰轅門已受降雲山疑望處彷彿見旌幢

江雨

梅里詩輯

卷一

五

落日隱蒼洲寒潮上柁樓岷峨赴東海萬里劃江流無恙三  
山色依然六代留蕭蕭蘆荻夜風兩石城秋

廣陵送張孟奇

乾坤同作客千里任飄蓬況復離亭別蕭條落照中濤聲揚  
子北寒色海門東去去烟波外無爲歎路窮

遊華石

遠郭皆山色誰知華石峯疑分巨靈掌擘此青芙蓉松逕不  
數里花源還幾重歸途互雲月水上有初鐘

化城寺

入門多古木暝色在朝林野鳥銜魚上歸雲挾雨深隔花聞  
縣鼓過嶺出谿砧寄客偶來此婆娑擁膝吟

秋齋

微涼醒病色高臥卽巖中賢聖何辭醉雌雄不辨風雲歸晚  
磬溼月出秋山空物候已如此孤懷寄爨桐

秋晚泛湖

秋水逐帆生秋光不可名日沈千樹暝雲漏半湖晴邨動移  
漁火沙喧覆鴈聲我心天其遠霜月倍虛明

湖上懷項民遜

尋幽每欣獨往乘興自成遠登山雨夜鳴千澗湖波曉上孤  
城谿頭綠徧芳杜林下紅飛落英惆悵美人何許春風寂寞  
含情

送沈純甫謫戍嶺表

聞君抗疏意何深謫去無勞作楚吟萬里祇今披瘴癘九天  
何日散春陰嶺猿欲下孤臣淚江樹應含故國心寶劔匣中  
梅里詩輯

卷一

十

君自惜莫因風雨夜光沈

寄懷沈純甫戍所

知君意氣尙縱橫海內猶傳抗疏名日月自懸雙鳳闕風烟  
不散五羊城笑提寶劔寒霜落醉擁瑯戈野戍平聖主近聞  
收逐客刀環應指薊門行

盤山

芙蓉陡削數峯藏立馬無煩指太行曲借河流疏鳥道直移  
地軸轉車箱雲陰出塞多踰互氣色臨關倍莽蒼極目龍沙  
春草外當年飛血尙玄黃

聞警

河西四郡古金湯戎馬秦城共此疆氛祲未全消太白  
材官誰復奮中黃還隨漢月開魚麗莫使邊風送雁行青

時大  
白經

海藩籬還可仗將軍好爲護西羌

潞河寄懷沈少司空純甫

驪駒纔唱又天涯芳草垂楊道路賒  
冀北未收朱汗馬江南自采白蘋花  
夢中落日虛懸榻客裏殘春正憶家  
門下祇今誰載酒尙因賓從問侯芭

宴

過臨淄狄參戎叔明留宴因憶向同許  
長孺侍御郊園醉別不三年而長孺已  
化爲異物不勝西州之感卽席有賦

憶昔郊園別酒醺重來感舊思紛紛  
忽驚合坐調清瑟無復分司問紫雲  
落日西州空有淚大風東海幸逢君  
于今燕筑人誰和且共離杯惜鴈羣

留別金陵諸好及家弟玄白

梅里詩輯

卷一

三

雨過江烟溼夜霜秦淮津樹曉蒼蒼  
故人乍對俱同夢有弟相逢鬢異鄉  
已自傷心驚歲暮那堪攜手上河梁  
春來若見梅花發多少南鴻向北翔

己酉人日

朝來寂寂草堂閒人日無詩自掩關  
藥裏檢來餘小草謗書投處任中山  
休將短髮頻窺鏡忽對長松偶破顏  
春色儘堪扶病骨白雲時見曳空還

徐元仗北上予病不能祖餞贈以詩

木落澄江增素波帆前秋色遠關河  
路經古驛寒砧近人傍清霄夜月多  
千里屋梁懸斷夢一時雲樹悵離歌  
亦知上苑鶯聲盡試聽南來有鴈過

重登天目絕頂

霜崖斷處瀉青苔，歷歷層霄見。沈寥金界遠，從干地出玉晨。  
高擁百靈朝，雲封古洞疑。生雨木落空，江欲上潮玄。蓋側身  
東向望，飛霞遙映赤城標。

出塞

雕弧白羽插寒空，獵獵旌旗卷朔風。都護只今臨薊北，單于  
切莫近雲中。吹笳馬上邊沙黑，洗血刀頭塞雨紅。征戍十年  
猶未返，秋原極目送飛鴻。

別陶逸則

霜滿燕山冷朔雲，離亭執手正斜曛。卻攜五柳先生傳去，傍  
孤山處士墳。苜蓿齋中聊作長梅花，窗外正思君。江南到處  
春偏早，獨聽嘒鶯不忍聞。

聞翁晉除南光祿

梅里詩軒

卷一

三

彤庭捧檄沐恩初，千里春雲擁傳車。逸少舊題光祿帖，嗣宗  
新拜步兵廚。地仍佳麗千年在，人卽風流六代餘。宦興從來  
君不淺，漢廷元自重相如。

送萬和甫還江西

去歲今年兩度回，片心遙指白雲隈。城頭擊鼓天未曙，江口  
候潮船正開。望望美人南國遠，淒淒孤雁朔風哀。明朝此地  
看山色，愁絕還登百尺臺。

釜山紀事

折衝樽俎近何如，四牡當年事豈虛。使節未通張博望，才名  
空說李輕車。東藩莫訝從魚服，北闕無煩覓鴈書。肘後黃金  
元不易，驚聞鼙鼓倍欷歔。

春懷

衡門過雨淨疎簾愁對春江淚共添萬戶耨鋤連海岱三苗  
戈甲遍巴黔和戎自詫長城險御馬誰知朽索織杞國憂懷  
殊不細起看林月步虛檐

春夜宿海上慧業寺聚公房同家姪六韻

落日翳松寮層陰壓暮潮春城山雨過法界海雲標義觸眞  
空悟心遺世諦超攢眉蓮社入把臂竹林招清夜遲花漏祇  
圍長藥苗一燈諸暗破何處旅魂銷

自天竺抵法相寺八韻

乍禮莊嚴相俄尋杖錫南笥輿懸樹險蠟屐破雲諸竹響清  
如夢松陰結似龕谿流全聽雨花氣半蒸嵐僧供分香積天  
音散蔚藍法門元不二淨業總超三轉覺浮生幻休言佞佛  
貪何當探妙諦一爲睹優曇

梅里詩輯

卷一

三

舟中眺雪十六韻

俯仰迷江甸東南凍未蘇扁舟下遠水積雪斷寒蕪朔氣連  
滄海窮陰混太湖瀟瀟兼霰密脈脈受風扶大地遙浮越低  
空近壓吳山川紛莽蒼雲木半虛無鴈路纔分影鷗沙祇辨  
呼戢鱗潛素鯉側目逗饑烏色借齊宮竝音操郢曲孤披來  
朝練淨映處夜珠枯不用裁梁賦偏宜入剡圖乍驚客鬢似  
卻怪歲華徂臘漸回杓斗春先到酒壚乾坤原浩蕩泥滓暫  
崎嶇自笑寒暄態誰燃造化鑪聖朝陽德在白日麗高衢

浪口渡

柳風吹浪花谿雲澹無色偶此爭渡人日夕未遑息

雨後自華石歸竹林橋晚眺

雨餘山氣佳日落野水白松翠撲衣來浮雲澹空碧

烟霞洞

古洞鴉路深杳渺不知處忽見烟雲來疑從此中去

館娃宮

不嗟亡國餘而憐奇豔絕翻得捧心人吳宮名未滅

龍潭垂巖觀瀑

不聞風雨聲懸崖但垂滴夜深秋月來瀑影在寒壁

從西峯抵會景堂

葉落空山徑微疎林不礙雲飛巖光欲沈僧舍松翠猶撲人衣

過高白堂

寒流一溪晴雨秋色千巖夕曛犬吠門前落葉僧看峯際孤雲

梅里詩輯

卷一

十四

題靈隱澗西李山人居

茅屋林棲澗水西陰陰萬木昏鴉嘯遙聞古寺數聲磬落日半山雲滿谿

西湖晚泛

南屏山色碧於苔日落湖光倒影開天際片雲飛欲盡滿船秋水月明來

漢宮詞

酒罷西宮歌舞闌寶刀試掣夜光寒妾身願作珊瑚靶常得君王醉裏看

雨中漫興

春水遙看欲上城蒼茫烟樹接雲平東風吹落王孫草都向離人夢裏生

李正華

正華字就實號虛航貢生官淮安府教授贈兵科給

事中

縮會按先生為節愍公之父少時曾有拒奔事為學官待士有恩諸生某因貧連賦縣申學使者先生捐俸代輸之得免黜貧而能文者輒資送棘闈或得志倍資以酬堅卻之其他多類此宜其後嗣昌大篤生忠烈也

維揚道中

倚懼邗溝寐未成綠楊城郭晚風清玉人去後簫聲寂二十

四橋空月明

雲

王店亦曰王塾吳越時尚書王遠居此因名學正及孝廉昆季皆其裔也梁石門題王氏梅花莊詩曰蕭灑山莊對翠岑梅花渾似白雪深西湖處士臨流翫東郭先生踏雪尋晝暖山蜂喧隔屋夜清霜鶴唳中林朝川舊日多松竹同是高人冰玉心李藿園與沈侍郎思孝善沈以抗論江陵杖謫藿園餞行陳大義以廣其懷後同

梅里詩輯

卷一

五

寓吳興往來峴山碧浪間壺觴嘯咏續劉寓公孫山人之社教論臨安時於前望程諸生先行後文士多振起著有青蓮館初稿偶寄軒稿寄茗漫草薊易寓言河梁編兩都社草兩日游紀汗漫游草諸集總名澄遠堂稟其藿園詩存僅選刻十之六耳李良年并其子士標蒼雪齋集孫寅眎彼亭集合刻之曰澄遠堂三世詩存蔣南邨題曰范氏雕龍已擅三世王筠家集將傳七葉孫融識

梅里詩輯卷一終

梅里詩輯卷第二

梅里人許燦衡紫編

李衷純

衷純字元白一字天虞號廣霞國博應徵弟萬歷壬

子順天舉人知如臯縣遷南工部主事督關蕪湖轉

兵部員外郎出知邵武府擢兩淮運使有激楚齋草

詩話都運詩文早受知於王弇州又從顧端文郭美

命葉進卿諸公遊中朝多以東林黨人目之其在雒

阜治聲冠江北民為能吏其推重如此

文人長為通儒晚為能吏其推重如此

緒曾按元白激楚齋初草余得其五世孫名駢字邁

倫者手鈔本有李維楨序云獻吉于麟及維楨為三

李而元白四之陳學士懿典黃學使汝亨皆有序初

草徐作諸生孝廉時所作晦堂詩輯不登其七古今

補錄四首豪邁有氣魄

古別離

卷二

長安百尺樓其戶銜明璫岩峩入雲中雙闕遙相望明月照

玉顏皎皎流素光中夜理瑤瑟纖指發清商初彈雙黃鵠再

彈孤鴛鴦淒颯動羅帷餘響激微霜仰視河漢直寒波浩無

梁安得高飛翼為君凌空翔

佳人渺天末雙珠忽相貽精光射星斗文彩驚漣漪錯以金

鳳凰繫之珊瑚枝含情結膠漆形影相追隨奈何中道隔一

朝生別離昔為雲中鴈今為水上鷓鴣蹊違既已遠會合復何

時深閨徬徨立愁緒誰能支

感興

蓬邱有奇竹脩脩青鸞尾飄搖拂白雲天風日夜起伶倫截

為管吹之鳳相似一朝張洞庭清商間流徵長空下玄鶴迴

翔百靈喜安知市上奏聾俗笑相詆舉世無知音誰能為側

耳

長安少年子意氣凌九州吳鉤繫錦帶玉勒青驊朝遊金  
張第暮宿平津侯徒侶若浮雲冠蓋紛依投黃金爲肝膽片  
言結網繆如何敝褐土躑躅揚商謳一如豔冶春一如蕭瑟  
秋芳蘭在深谷含香終自幽

甯戚昔飯牛舉國無人知短衣空自憐長夜復遲遲叩角向  
天歌其聲一何悲桓公忽見盼壯心乃得施朝脫牛口下暮  
升青雲涯鴻名爛鐘鼎千載令慕思奇士未遇合尙與牧豎  
隨

六鼇虛入溟颶風驅狂濤簸蕩沈日星天地爲動搖赤蛟泣  
深穴紫鳳鳴悲號帝怒呼龍伯脩竿還見招神山壓巨首低  
垂不得驕由來造物意往往羈其豪寄語鯁鱗徒毋爲易相

梅里詩輯

卷二

二

嘲

東方慕龍蛇醉歌金馬門傲弄公卿間詎諧動至尊其跡或  
伴狂冥然道自存與世貴和光終能保其眞三閭爾何爲白  
日投湘源玉體埋魚腹長作秋風魂

青陽不我留素秋忽已屆商飈淒前除明月澄永夜蟪蛄嗁  
空林華葉盡凋謝天道有衰榮萬物疇不化誰云魯陽戈義  
輪爲返舍思欲登崑崙惜無雲螭駕褰裳望清川蕭蕭涕雙  
下努力崇明德庶免景光訝

送董君謨

孤鴻號遠道參星橫疎林酌酒淚盈解清商不成音爲別感  
不淺失意悲獨深琳琅棄沙石騏驥委路陰雖未遭卜筮終  
將識所欽努力守至寶無爲嘆浮沈

幽幽谷中蘭鬱鬱河畔柳嚴霜忽以催榮華不能久世情變  
朝暮恩誼乖新舊含悽再申意與子期不朽形影雖云離肝  
膽自可守結交在朱顏久要在白首

寄沈純甫

束髮好濡翰百代期窺索雖乏鴻鵠姿安能逐鷓雀賤無鄉  
曲譽狂得世人愕何意蒙採甄君子情不薄倒屣結金蘭亭  
軒過蓬藿豐獄識司空鹽車逢伯樂拂拭驚虹霓烟霄思騰  
躍三上不見收再別空自握因悲負雲盼未宜甘瓠落羽毛  
尚能飛終當翔寥廓

疇昔其孌婉旦夕長追隨放浪東山屐縱橫西園厄穿雲躡  
層崖乘月弄漣漪清歌無隻陳奇襟必雙披奈何久離別曠  
然隔雲泥雲泥雖云隔故心能不遺素字珍玉案新章洽金

梅里詩輯

卷二

三

徽感激一哀吟使我揚雙眉黃河萬里夢忽墮燕山湄安得  
托翔鴈一覲君光輝

懷吳儀部之矩

長離擘高岡蟠虬媚深淵一鳴振奇響遠引逃世牽懿茲卓  
犖士抗志凌雲烟危言竄絕徼百鍊彌貞堅回光散陰霧清  
風濯芳荃終然厭珪組歸向青山眠玉潭鑒明月霞洞通寥  
天縱屨探窅窳方舟狎清漣吐藻托弱毫湛慮窺幽禪浮榮  
等遺屣肥遯將窮年蒼生望安石白羽需魯連願解巖壑戀  
拯此時運邇神交久金石跡曠阻周旋延佇睇碧雲芙蓉落  
長川終期慰良覲攜手乘風騫

紫雲洞

天墜萬紫雲化作青山石高下穿烟竇宛轉捫苔壁初疑路

欲迷靈構忽中闢一柱湧玉龍太古倚空碧香霧忽沾衣瑤  
花欲留屐金泉澄奇光下有蛻人宅羨門如可呼一笑乘風  
翻

游石湖上方山

杖策登秋山停櫂澄湖淚牽蘿恣幽尋攀崖愛徙倚微霰集  
遠空寒松媚餘晷峭壁干雲青蓮峯含烟紫秀林紛悅矚哀  
禽時傾耳映月濯清流沂風采芳芷花下弄瑤瑟巖間食石  
髓愁因妙賞遣興逐孤吟起將留塵外屐永逃區中軌澹焉  
獨躋踏遂得養生理

沈嘉則過訪尋有金陵之行歌以送之

北風颯颯常閉戶著書自放還自苦微賤甘心骨肉疎貧窮  
那望交游觀一朝紫氣天際開東海真人江上來杖底烟霞

梅里詩輯

卷二

四

生五嶽匣中詞賦傾三台見子落魄態謂子壯士概不朽在  
千秋世情安足慨沈夫子論何昂藏聽君語罷我欲狂使我  
意氣如電心如霜牀頭無錢堪買酒便向當舖典驢驢沽來  
葡萄三百斛與君日醉高陽傍一彈綠綺虹霓落再鼓朱絃  
流水長沈夫子君謂中郎倒屣得王生我亦謂文舉忘年親  
彌衡黃金白璧不足問雄心俠骨都爲傾君今忽欲與我別  
落日蕭蕭江水列楓林曉入洞庭雲蒹葭夜宿瓜州雪得到  
金陵已及春六朝舊事俱烟塵還從采石磯邊過應問當時  
宮錦人

錦繡峯歌

我昔曾游閩粵玉華洞千異萬怪恣探弄羽毛鐘鼓雜鼎彝  
虎豹鯨鯢間鸞鳳中有數柱高插霄瓊瑤亂縱飛螭螭相遠

忽已七八年勝境時時入幽夢茲來偶過浮光州乃覩奇石  
凌霜秋恍惚玉華洞中物令我神爽驚雙眸歸如銅柯標團  
若球笋植其內芙蓉姿其外薜華色星斗淋漓環轉懸珠璣  
錯落盤旋飾時吐烟霞蜃氣凝忽鳴風雨龍鱗逼英巖曲折  
難足倫太湖玲瓏詎堪敵余也好石似米巔拜之便欲石下  
眠徘徊拂薜仔細讀錦繡三字銘猶鮮璀璨不數蜀綺麗灼  
爛何況秦綃妍縱使女媧鍊不就豈爾天孫織得全主人因  
之出圖譜宣和玉璽千年古良嶽山頭第一峯萬壽殿前無  
敢伍當時綱使輦東吳天子得之喜欲舞朱提千鎰帛千端  
敕賞中官猶識左晏怡未久變滄桑烽火干戈躡金虜汴城  
宮闕盡爲灰梁苑花石皆作土獨有神物呵鬼神此石猶存  
陳氏庶陳家兄弟雅好奇築臺鑿益安階墀蒼松掩映高百  
梅里詩輯

卷二

五

尺紫鸞守護光陸離月下彈琴對清嘯風前把酒佐題詩卽  
此便逾宗炳室十洲五嶽又何爲

午日飲石橋巖放歌

我來白嶽已三宿兩隻芒鞋一節竹峻巒峭壁盡躋攀曲洞  
幽溪多剝啄自謂探奇奇且窮山靈無復留餘蓄那知別有  
石橋巖隱在西天萬山谷半空幻出芙蓉杠絕頂劈開虎豹  
屋恍似百尺渴虹挂碧霄又如半輪弦月懸蒼麓石龍十丈  
橫亘之迸眼戟髯向天矗時時吐泉鱗甲搖疑是中藏雷雨  
瀆捫蘿荏苒到橋邊岸粵徧欲驚豁然一畝霞窗堪共坐半  
牀雪竇好孤眠白雲來往白波蕩綠樹參差綠水淀拂苔細  
讀磨厓字半是淳熙元祐前須臾轉騰橋背立颯颯罡風吹  
玉笛千峯萬峯圍若屏巾烏衣裳盡翠滴雙鹿飲清流羣鳥

嘯絕壁批杷野人供蒼蘆山僧覲種種決背開心臆此時日  
午正當中興來大叫空山空急呼旨酒葡萄紫調入丹砂琥  
珀紅鯨飲一吸三百醜世間萬事俱鴻濛我不能如屈大夫  
投身汨羅江令人此日弔芳烈亦不能如許由巢父洗耳穎  
水濱糠粃唐虞與世絕願如嚴君平向子長九州五嶽俱歷  
閱死便埋我亦不拙

王世周墮水歌

王郎意氣截臬吐長虹每欲跨鶴騎鯨凌遠風上衝碧落琳  
琅闕下撞紫海珊瑚宮卽今水漫蒹葭白愛殺霜林楓樹紅  
獨拏小艇泛南浦悠然遲月憑高空  
中流倏忽陽侯怒桂楫  
蘭橈悲斷蓬橫飛雪浪星河覆亂撲烟霾水魅雄倘能破冢  
未計拙遂爾沈淵眞路窮觀者如堵咸震慄王郎大笑波中  
梅里詩輯

卷二

六

古蕩

出自言不減蓬壺游翻恨波中浮太疾耳中濤聲萬馬馳眼  
底流光千電殊奪得龍領徑寸珠踏翻鼉背三山石游女解  
贈漢濱珠靈妃鼓送湘靈瑟卻嗤天吳不能挾我遊鴻濛又  
調屈原不能留我作儔匹我今與君且喜莫驚呼君亦不須  
爲我擊筮篥歌渡河但日醉綠酒朱顏酡若論生死須臾耳  
坦途何處不風波人間萬事俱么麼

大青嶺

平野千峯立深林萬木喬山雲晴帶雨谿水暗通潮入市魚  
鰕賤經秋筍蕨饒因思卜一室生計老漁樵

峻嶺盤雲上奇峯斷壑橫路從溪水入人在竹林行日落畏  
聞虎秋深猶有鶯大江平眺外隱隱暮潮生

由禹杭經臨水潛陽唐昌山行

一入禹杭境沿溪路透迤桑空蠶市畢筍長燕巢多瓏坂收  
殘麥山田種早禾似聞農父語矯首望滄沱

山中昨夜雨曉色未全乾泉瀑飛人面烟嵐障馬鞍流鶯唬  
樹澁密篠壓谿谿寒何處尋天目千峯雲際看

出門

出門何所事飄泊任浮萍龍劍尋知己鳴夷笑獨醒曉帆江  
月白晚爨渚烟青欲識山川勝時時驗水經

懷王世周

王生寥廓士臥病海雲邊土木形骸在蓬蒿歲月偏欲尋燕  
市女還買鹿門田近日無消息秋江斷暮烟

善權山中尋著公蘭若因止宿

梅里詩輯

卷二

七

溪山本幽絕蘭若更孤清客到鳥不亂坐來泉自鳴石牀青  
靄積竹徑翠苔生月出松壇步悠然鐘磬聲

春懷

貔貅十萬下遼陽經畧專征有侍郎殺氣正殷箕子國捷書  
空奏日南王蠻天轉餉愁中絕異域孤軍蹈險亡何似乘機  
歌杖杜壁空青海制扶桑

江河萬里夾神邛懿祖皇陵在泗州一自桃源斷東注遂令  
瓠子盡西流波侵王匣金鳧冷濤撼珠宮石馬愁王氣國家  
關不細急疏淮水海門收

年年萬國思儲立一詔分藩大計孤丞相有心迎紫闥小臣  
無計伏青蒲波搖少海蛟龍泣天借前星日月扶社稷靈長  
知漢祚豈無四皓定鴻圖

江東獨給水衡錢募艦征兵四野宣揚僕樓船衝白浪夫差

李中丞幽繫未釋所

強弩射青天虎頭國士南冠繫鼠臂將軍斗印懸

遣募艦使者皆市井無賴

廊廟運籌多秘算野夫空自泣春烟

中興直諫盡名賢何似東京漢帝年國是漸生朋黨論主恩多屬宰衡權參天松柏風霜苦蔓地荆榛雨露偏近日喜聞收逐客可容常侍紫宸前

春來積雨晝陰陰日掩柴門感慨深賈誼未酬經國志終軍空負請纓心霧沈元豹空山臥風起蒼虬大澤吟三寸肝腸數行淚唯餘一劍是知音

### 送賀伯闇下第遊燕

秋天不斷雨霞霞木葉風高行路難獻賦十年蓬鬢短辭家九月敝裘寒黃河日落飛颿度岱嶽雲深立馬看怪道客星

梅里詩輯

卷二

八

橫北斗知君彈鋏在長安

### 送沈純甫先生自嶺南戍所拜符卿還朝

金雞初放到遐荒遷客驚呼尙璽郎一疏批鱗懸日月七年環甲歷風霜西臺劔不埋龍氣南海珠能返夜光聖主求忠知正渴好將補衮佐垂裳

### 送陳孟常太史奉使還朝

春風楊柳拂雙旌使者星軺返玉京一詔責躬憂漢主九天持節識長卿花深禁苑分仙露月落宮城聽曙鶯還念東南民力盡好從講幄達承明

### 贈曹能始廷尉

閩海孤鶩萬里翰文章弱冠獨登壇兩都詞賦推平子千載箕裘自建安駿骨解收燕市易蛾眉長倚漢宮難聖朝雨露

先豐鎬莫對春風怨楚蘭

浦口道中

今年十月氣尚暖江北宛似江南天未凋楊葉黃冉冉欲吐  
麥苗青田田老農築塲放犢臥少婦壓槽呼客前長途風景  
亦不惡馬蹄且踏寒雲穿

茗上呈伯遠家兄

綠波青靄泛孤槎到白衡門埽落花入夢池塘應有句近人  
魚鳥欲忘家瓦盆漫倒烏程酒石鼎閒烹顧渚茶城外何山  
兄弟隱可容邛壑共烟霞

雨後

夜靜空山中鳥鳴知雨歇寂寂啟寒扉林端澹疎月

順昌道中

梅里詩輯

卷二

九

山如眉黛水如羅谿上人家繡戶多十五小姬催客酒銀箏  
彈出伯勞歌

石門雙峽插天空萬朵芙蓉映水紅但載順昌三百甕不妨  
常阻石尤風

徐生自燕中還貽予袖刀因談故太史君典事有感

攜來匕首欲飛霜劃罷青天淚幾行我亦燕丹門下客和歌  
不在白虹傍

雨前一日試龍井果上人所寄新茶因思去歲此時與  
民逸鬪茗果公房今民逸不可作矣豈勝人琴之感爰  
賦二絕并餉一罌令慶生歌而酌之几前

去年此日阿蘭若相對煎茶坐夕曛今日山僧遠相寄自烹  
殘月煮溪雲

竹爐石鼎雨前春風味林間更幾人君自夜臺尋陸羽獨憐  
後死泣松筠

鄭士奇

士奇字平子號青城萬歷戊午舉人歷新城靖江教

諭遷知贛州興國縣事有松窗老人稿

詩話先生治興國僅八十日以耳聾告歸前令是者  
民間輸賦取之無度民困日甚逋賦益多先生至額  
外不名一錢比去官民赴府懇留守復強令視印三  
日納賦者如市積逋一清歸老田間復數十年遺集  
無多對松一歌最其所自負者性嗜奕至孫谷咄遂  
以奕名于時先生兄士俊以例貢官京衛經歷

春日遊百丈山

春遊如飲醇著人自成醉借我二三子一探山靈秘山光似

新沐烟壑薄生媚行行六七里曲折愈幽邃巍峯插雲表高

聳青螺髻如鶴在雞羣體態自矜貴松柏鬱蔥蔥霜皮苔蘚

梅里詩輯

卷二

十

翳香剝烟火冷荒碑亦無字捫蘿躡峯頂怕有剛風至徐徐  
轉山根石竇一泓翠清淨愜素心含漱來芳氣不知幾洞天  
試覽名山誌

遊大兒公徵清溪小築漫賦

冬暖似春霽烟光媚林麓放舟清溪裏逍遙溪上築稚子侯  
我來歡迎雜僮僕四圍多蒼翠流水繞其屋雖無華軒敞雅  
堪靜者伏小齋虛白生可以攤書讀前植庾嶺梅後種蘭亭  
竹墻東野老家鬱然蔭古木西舍鷄鳴樹正爾登塲穀頗饒  
田家興較量雨晴熟每愛鹿門龐何減子真谷

對松歌

一片冰心只靜坐我日對松松對我相對渾疑太古仙洪崖  
在右浮邱左問我何爲結契深我亦難將思議尋祇覺高情

成莫逆惟松識我歲寒心歲寒亦有梅與竹獨喜古松更偉  
肅勁節還逾菊傲霜幽情迴勝蘭生谷憶昔初領山城甌廣  
文先生夙有緣忽發天目一遐想栽松快似挾飛仙而今已  
經十八載翠色蒼姿常不改有時半天風雨來疑有臥龍起  
滄海鱗甲琤璫勢欲飛滿庭寒影娛清暉旭光曠矚露膏沐  
月明淡蕩雪霏微四時對松多絕好若到秋來如見寶秋來  
詩景只有松襄陽白首成偕老七松居士我家風四松亦植  
草堂中道人一松亦已足盤桓莫是柴桑翁涼天散步神閒  
適設設松風生兩腋永日婆娑興可知三山飛到鶴一隻喜  
我得君爲老友喜君伴我稱老叟贈君一首對松詩白雲留  
住神仙久

釣臺懷古

梅里詩輯

卷二

十一

擇地逃新室披裘對故人星原占是客帝豈得而臣瀨急迴  
潮信壇高費釣緝不知梅福女借隱幾冬春

澄江回署陳伯英園亭一望佳勝爲寄此詩

籃輿曲曲見疎籬一帶烟林點綴奇可許大江吟謝朓將無  
一雨晝徐熙春寒尙覺賒花信梅早應疑有雪枝遙憶元龍  
高臥處時呵冰石費尋思

題蔣璋峩肖竹樓

海屋山人屋似樓秋來還似小山幽曉窗把卷露初滴夜榻  
調琴月正流有客造廬還放鶴呼童埽徑只盟鷗元之漫說  
能消遣得及元卿棲逸不

庚寅冬日

蘭陵華胄早成婚皓首相將老灌園萊氏逸妻稱道友緜山

仙鶴有曾孫當年隨我飛鳧鳥此日偕君隱鹿門屈指生平如昨日蓬萊清淺幾堪論

李士標

士標原名大椿字霞舉號窿庵國博應徵子以縣學生入國學除上林苑丞遷甯海州同知崇正壬午冷口兵入卒于城守卹贈尚寶司丞有蒼雪齋詩存

詩話司丞表窮發之節安欲發之墳贖良家之鬻身全少婦之守志陳坊沒之弊而里人蒙惠進上官之意而勢家抵法燬行非一其在圍城也州乏長吏獨以忠義激勸雖勢迫累卵民無異心積勞致疾身殞而城隨陷闔門死義者二十有三人厥配沈安人吳江詞隱先生從女也工詩詞無片楮傳者

重陽後一日邀同沈司馬姚叔祥沈汝納泛舟湖中卽席分得新字

水席鄰鷗布雲帆截浪頻插萸仍勝日載酒藉同人白鴈先

梅里詩輯

卷二

三

霜老黃花後雨新不須高處望吾自愛秋蘋

七夕立秋

秋至逢佳夕涼颺忽滿襟雙星明漢曲一葉下庭陰紈扇憐猶昨荷衣媿自今感時惟縱酒乞巧更何心

春柳

白門幾樹未藏鴉玄灞枝連漢苑斜少婦樓頭愁入望行人陌上正思家已看濯濯留春月漸覺依依隱暮花卻恨渭城聲斷處青青隨馬向天涯

江行卽事

渚鷗一一泛春聲江面烟消萬里平花月故臨揚子渡布帆無恙潤州城蒼芒曉色迷鴻鴈款乃歌聲怨杜蘅放眼正愁烟水闊亂山天際忽縱橫

春怨聞

夢後空思別後顏行雲疑作望夫山春風吹度青閨月知落秦城第幾關

李白明

大自明字先脩又字少白以歲貢除揚州府訓導殉難死有謫仙居稿

詩話司訓性傲好飲酒為文有奇氣詩篇馳驟縱橫千言立就自負太白後身因更字少白揚州城陷衣朝衣望拜孝陵自縊學舍家人從死者季子鳳侶等十餘人朱竹垞太史嘗議于里中建三忠祠合王公允昌李公士標祀之未果  
緒會按三忠祠余於道光二十九年與紳士補建增祀李公毓新更號四忠祠

覽輝樓

雨後驚濤響石磯望中烟樹轉霏微湘江直北陽臺路舊日

梅里詩輯 卷二

三

行雲何處飛

胡碧霞

碧霞失其名萬歷初學究有百憂集

詩話碧霞詩見樵李詩繫餘無所考

雨

細雨如絲引空濛爽霧輕沾衣纔見溼落葉更無聲旋入行雲去常滋蔓草生檐楹聊騁望漠漠滿江城

次李二仲美避暑雨上人竹院

逃暑翠微際還從支遁居竹光團砌滑山爽入簾虛謝客惟聞鳥澄懷并廢書坐深消白晝塵世復何如

草堂漫興

滿院清陰午半殘松花香染石牀寒幽棲白日憑詩卷蕭散

青林自籜冠避地祇分鄰水竹種花時葺傷池欄主人會有  
投閒意幾處看山與未闌

繆師伋

師伋字孟思有學圃吟

詩話隱君勤學博聞遭時多故屏跡不入城市惟以吟咏自娛父冰壺先生縣學生能詩工書法兼善填詞先世從鹽官徙居里之西村有官宗人府錄事者冰壺父也

中秋夜

故鄉今夜月遙望不勝情葉落空堦冷惟聞蟋蟀聲

九日

黃菊東籬下還逢九日開今朝尊酒盡無復白衣來

顧玘徵

玘徵字文玉一字玉虬縣學生有讀書臺稿

梅里詩輯

卷二

十四

詩話文學詩僅二百首七律居其十八所著有十五國風疏一卷名載經義考蓋好學之士也

感舊

烏衣門巷舊遊非王謝堂前燕子稀有客有客莫遑處式微  
式微胡不歸乾坤萬里愁雲合風雨三秋落葉飛極目天涯  
誰與語釣篷思老一漁磯

朱茂曙

茂曙字子蘅秀水縣學生自郡城遷梅里鄉黨私謚

安度先生以子彝尊貴 皇朝貽贈翰林院檢討有

春草堂遺稿

詩話先生相國文孫菽林名士壯歲遭逢世故貞介石之節撰兩京求舊錄工楷書善畫山水竹石見稱於華亭董尚書詩喜晚唐楷通天文醫卜之學性尤耽奕嘗期故人於閩中途次解后善奕者流連旅邸久之失期大困而返高懷雅量人樂道之

寄王處士遙蒼

自我去城闕子亦棲畝耶一舍道豈遠鋒鏑迷所投耨耕判  
沮溺闢徑違羊求凌晨起眺聽登我池北樓疎枝吐冷豔小  
鳥鳴啁啾春風吹戶外念子心悠悠

外父石屏守唐公別業池上作

買斷一池水重編六枳籬露寒聞蟋蟀潮落走蜚蜚柳色陶  
元亮山心向子期逃禪有精舍留賦入關詩

逢錫山過叟

圍棋第一品知有過文年相值三衢市且停千里船甯愁斧  
柯爛不顧燈花偏倚數本河洛問君然不然

秦淮河春遊卽事

橋下溪流燕尾分灣頭新水慣滿裙六朝芳草年年綠雙調  
梅里詩輯

卷二

五

鳴箏戶戶聞春雨杏花虞學士酒旗山郭杜司勳兒童也愛  
晴明好紙翦風鳶各一羣

秋曉

栖霞樹杪嘯趣織籬根語不見拗花人秋露濃如雨

鶴洲對酒

已收橋下釣復此石上酌百尺凌霄花紛紛落紅萼

牽牛花

金鷄初動露華滋最愛娟娟竹尾垂多少紅樓昏夢裏不知

秋色到疎籬

京口別元孩後登樓作

西樓昨夜露爲霜風葉新紅柵葉黃愁絕江南望江北雨鈴  
風鐸正郎當

虎邱竹枝詞

懊惱墩邊花滿枝鴉頭襪小上山遲新來嫁得兒郎偉冷笑  
經過短簿祠

屠明簡

明簡字右文一字大江縣學生

詩話先生博極羣書詩文質奧雁字詩七律三十章  
刻鏤神奇出塞之作可謂新警

出塞

白草衰蘆滿地霜秋來塞外盡黃羊自從身出榆關後無定

河邊是故鄉

張麗華

歌殘玉樹晏初移兵到宮門君未知豈是蛾眉能亂國羣臣

先草出降詞

梅里詩輯

卷二

去

李寅

寅字寅生又字曉令號球仍贈尚寶丞士標子秀水

副貢生有視彼亭詩存

詩話太學復社名流砥厲風節志存用世崇正末年  
江以南不逞之徒動相煽誘里中惡少以藍帛纏腰  
結羣暴橫號青腰黨二三巨魁寔李氏賊獲之裔太  
學以計誘致之縛而控諸市餘黨解散間里以安既  
而以結客破家卒于嶺表論詩於唐取太白不取昌  
谷于明愛大復昌穀亦置鍾譚為逸品華亭楊四規  
序其集以三閩少陵之忠愛比之

秋夜讀書

涼夜月如霜簷前露始結託身翰墨間流覽觀往哲書蠹走  
駸駸寒蟬唳烈烈家人笑我迂我嗜不少輟吁嗟天下事歷  
歷有前轍遺文浩江海一葦詎能涉偶持尚友心章句非所  
屑俛仰得澄懷君焉開蹇劣

雜詩

西北有高臺豐隆勢崔嵬赫赫麗飛甍綺戶雕金鉅所嗟榑  
與棟用此樛櫟材松柏挺勁質霜雪不爲摧捐棄爲勞薪徧  
生蒿與萊和風煦萬物暴雨兼疾雷春熙洵可樂秋肅誠可  
哀永言慮興替懷抱何時開

恒雨歎

今年正月饒雨雪雪盡春還雨不絕及到黃梅雨益奇銀河  
迸注黃河決高田作隄與水平下者舟入田中行崩墻倒屋  
壞城郭歛忽似有蛟龍爭農夫有苗種不得漁父持竿空太  
息買刀賣犢勢必然誰能忍死不爲賊只今邊庭擾師旅閭  
閻漸覺誅求苦橫索官符歲歲來東南未可稱安土眼看海  
水淥桑田安得嘉禾似違年挽回氣數羣公在不信堯湯事  
梅里詩輯卷一

一七

偶然

遭家難後夜泊平望有感

犬吠寒塘寂漁歌次第生遺愁明月好多難故園輕野曠林  
無影天空鴈有聲風波今夜少差息旅魂驚

桑墟鎮

日色纔過午行裝且暫停人家隔岸少魚蟹滿湖腥水漲難  
過騎村虛易數星回看昨來路歷歷遠山青

立夏前一日夜雨

野綠忽已暗坐深燈影微偶然生夜雨從此換春衣漸覺庭  
苔滑俄驚木葉肥溪流添綫尺恐失釣魚磯

社日

東窗十日枕書眠病起都忘歲序遷社酒村蔬從草草曉鶯

語燕自年年童炊茶曰翻春雪花拂琴牀落古絃有客解憐  
疎懶意朝來遙寄白雲箋

是日錢仍始以詩至

芹城先生過訪夜集謾譔軒限韻時予將閩游

無端木葉下寒沙肅肅飛鴻過影斜痛飲悲歌歛仄注撫今  
追昔感琵琶歲寒止有松當戶雲洗還看月照紗離色漸催  
紅燭炮游情先繞幔亭花

九日臥病家園聽雨

江鄉風物已蕭然十室聊存一室烟病裏把書銷白晝貧中  
何計買青天竟拌積雨淹佳節空憶晴雲是舊年那得有人  
來送酒原無黃菊在籬邊

雲陽道中初見楊花

雨餘山氣夕陽銜柳絮濛濛逐去帆有客江潭怨飄泊東風

梅里詩輯

卷二

六

莫遣到征衫

余小星見訪時方買妾隨有白門之行

離歌高唱對離樽酒挹桃花扇底痕若向秦淮重喚渡定攜  
桃葉訪桃根

褚醇

醇字灝爲號齋齋縣學生有褚子癖言

詩話齋齋詩沈鬱憤懣言不足而心甚長

惜交

末世無良朋相交惟以利富貴而奔趨貧賤而背寘范張邈  
焉儔華管動成恚或有初終心炎涼能不異貞士抱恒德所  
期在一致堅則金石斷臭則蘭芷比如何執刑盟中道猶做

屣鳴呼孟門嶮昔賢所以刺

海昌野廟

杖策空林外行吟過野廟容膝得有基烹泉苦無燒北風吹  
荒雲日月澹光耀迎門水潺湲魚瘦不堪釣

病後齋中獨宿

半墻月影牀前明風翻樹底葉作聲病客此時不能寐哀蟬  
來朝始得鳴依依故人十年別遙遙深夜孤燈清忽聞芭蕉  
灑微雨起視庭堦苔蘚生

同王言遠許白生遊硤石

適意暫遊目浮光接紫薇松林風氣冷竹路石陰微虎豹千  
層峭鷹鷂二月肥忽聞鐘磬遠因與叩禪扉

同李霖叔吳荆倩登烟雨樓

勝地足登臨興亡感昔今綠苔留壁老青草護碑深水靜能

梅里詩輯

卷二

九

遊鱣庭空自啄禽經營端有待憑眺其傷心

除夕

斗酒醉未得單衣寒獨親明朝青鬢老不是去年人

詩人

人字公凡一字昭遺

詩話布衣泉石盟心潛踪村僻嘗見其詩箋自署桃  
花里人史文學人肇喜蔣公凡移居吾里詩有穆溪  
十載寄幽廬之句蓋屢徙而後定居梅里者也

甲寅夏杪寓真如與五明大士談禪

長夏日當午炎威發驕陽孤蹤寄蕭寺漢松許徇祥時對古  
賢聖心神矜且莊枯桐絃一二指觸生宮商倦卽提筇竹緩  
步循虛廊偶與老僧值攜坐聯匡牀莓苔冒檐瓦薜荔絡絡庭  
牆隨口詢般若豎義詮空王爰酌天乳碧松火旋飛揚瓷素

擬瑤壁若翠振旗槍清甘沁膺腑兩腋扶秋涼曰歸遂偃息  
化蝶依花肪自茲良有省嘉會其未央

惠陽除夕

十年當此夕強半在天涯異地重為客殘冬未到家歌聞蠻  
調苦燭暗海雲斜更見梅花發能無感歲華

歲除前五日送金子還白下

衰柳不堪折寒梅聊贈行春風知幾日還到石頭城

李麟友

麟友字振公一字于苑學博自明子有醒齋詩草

詩話布衣孤忠遺體高隱名流詩篇恣肆激昂不落凡近

沈子以匹練見遺賦謝

梅溪李生長衣褐冬亦不加夏不脫已經寒暑六七年襟領

梅里詩輯

卷二

三

不完襟縫豁沈郎好我情不疎贈我匹練五丈餘製以為衣  
見賓客舉止覺與常時殊鄉人重衣不重德談笑從今壯顏  
色

客夜

夕陰山翠重寒色上河橋夜雨三更雁秋風八月潮官亭人  
寂寂驛路馬蕭蕭裘敝經年客歸魂不可招

登審山有懷周篔簹沈進褚越諸子

長水通梅里橫山近硤川登臨猶可見惜別已經年葉落清  
秋樹鴻飛薄暮天故人無恙否卻望一凄然

春暮有懷朱十彝尊客越

飛花三月暮春色滿江關芳草天涯路王孫去不還

吳拱辰

拱辰字荆倩嘉興縣學生  
詩話先生抱道自高詩體淵穆明靚婉而多風

儷古

萋萋春草生習習春風吹  
綫彼婉孌子顧盼生光儀  
妍質爲誰飾惠心強自持  
盛年當遠別冶容能幾時  
展轉虛房中淚下誰見知

芙蓉滿江皋芳馨一何好  
凝睇忽有思采以貽遠道  
不惜寒露零所憚秋風早  
故心應久持榮華共相保

高樓不可極上與閭闔通  
中有姣人居被服何玲瓏  
當窗拂素袖坐理朱絲桐  
一彈下玄鶴再彈來清風  
坐令聞者泣不知感何從  
撫軫良自惜古調非今同  
願爲思歸曲一寄雙飛

鴻

梅里詩輯

卷一

三

李元白有弟名衷元著有蘆中吟草惜已失傳朱安度  
著有兩京求舊錄孫融識

王 翊

翊字介人有秋槐堂集

詩話布衣十三服賈識字無多偶覽琵琶曲本試爲之輒工進工填詞又進工詩時竟陵流派盛行布衣千秋自命以起衰爲已任一時名流多爲推重陳推官子龍爲作序王僉事思任至不敢與調答于是徐杜周繆朱沈十數君子相繼而起梅里詩名盛著吳會間惜著作一弃于盜再殘于鼠傳者什一耳布衣本狂者而操行高潔嘗買妾妾故有夫立還之周延儒再召賦詞規諷盡其忠告時與阮大鍼吟讎觸然不緇張冢宰慎言嚴司李正矩先後欲官之掉頭不受布衣葢非徒詩人也

銅雀謠

銅雀來起高臺銅雀落高臺作銅雀飛臺成基

苦寒行

梅里詩輯

卷三

一

江南春遲花不萼雨雪凌寒戰冰雹山中餒虎不得出氣懾  
蒼龍脫雙角自經殺掠人烟疎生民十九無完襦輿臺衣錦  
沉羊酪笑擁越女歌吳歛

江皋曲

爲愛新妝好東皋出采蘋春江千里色解佩不逢人

登臺

日暮登臺西風鴈來慨然念遠離居真懷躊躇千里靜言勞  
思爰有旨酒斟之酌之拔劍高歌哀音孔多沈吟忽斷中心  
奈何繁星告夕薄寒求衣明月不墮輕霜自飛稽山之東大  
海處之衆水所歸曾不盈而透迤今古山川屢更嗚呼往者  
實多于生

圍桃

春花爛漫開春鳥間關嘯一朝坐見物華改鳥聲嘯盡花成泥園中桃須老園中樹莫遣隨風到處飛飛出園中去

車遙遙

車遙遙妾致辭君將裝束妾念之只今豺狼滿天地孤身遠遊恐非計君不見路上塵天寒雨溼吹不起雨晴復上征車輪征車遙遙不停轍路塵撲車幾時滅

民兵行

朝廷徵民兵移文下鄉縣縣官承選募抽丁悉貧賤含悲釋耒耜努力負弓箭未諳邊塞苦先絕室家戀臘月到漁陽飛霜割人面來朝兩軍合生死期一戰吞聲告同列封侯爾何羨

白紵曲

梅里詩輯 卷三

二

銀紗隔燭花續紛美人起舞顏微醺橫波窈窕情不分風飄翠織鴛鴦袞遷延欲前顧妝影月華沈沈照金井夜半烏嘯忘夜永

牧牛詞

二月三月春雨晴渚田水暖芹芽生牧童驅牛出原隰細草青青牛可食夕陽短笛不見人吹過村南又村北

猛虎行

北山猛虎何斑斑夜出索人晝不還路無人行食不足只向山中守麀鹿可憐日久麀鹿窮猛虎亦死深山空

飲酒樂

銅龍呼漏傳一更蠟烟燦鳳千枝明馬馱春酒浮猩猩金卮細沫鳧花生鸞刀絲縷調侯鯖紅虬作脯越餘馨瓊光美妾

簪藍瑛月麟香散柘枝輕纖喉裊雲歌一聲主人留客歡未  
已座中少年醉不起

無可奈何曲

吳姬白皙妖且妍雙鬢墮馬如雲偏流波宛轉情遷延琵琶  
暗撥鴛鴦絃月華照夜明蒼烟爲君酣歌樂當年勸君莫惜  
黃金錢明朝花飛月亦沒青塚家家泣枯骨

捕蝗

六月七月傷亢陽野苗渴死原田荒江南江北千里赤三歲  
小兒皆捕蝗蝗飛薨薨天亦蔽日光高懸不照地城中斗米  
盈千錢生捋皮肉資烏鳶烏鳶得食自飛去人骨纍纍反無  
處

休洗紅

梅里詩輯

卷三

三

休洗紅洗多紅漸失曾記初著時人矜好顏色徒傷未做成  
棄捐悔不作事慎從前

烏栖曲

深宮烏曉天未旦城頭擊鼓明星爛吳王晏罷天未晞繁霜  
落樹烏驚飛

烏夜啼

烏夜啼烏柏樹獨宿不成眠秋天何時曙

官船曲

山家畏虎狼日斜閉門臥向夜官船來捉人嚴守邏  
隴中水勢急與石相抵悟月暗富春山官船乘黑去

長干曲

揚帆下長江日落秋雲起夜半聞鄉音知是長干里

幾日沙頭望舟行逆浪難明朝風日好便擬到長干  
采蓮曲

東家采蓮童西家采蓮女同在荷花中人稠不得語  
靜夜思

虛帳含秋月高樓怨別情明河一萬里夜靜水無聲

子夜歌

鳴梭織春羅裁衫寄郎著裁衫不裁裊下體古所薄

汲井吟寄范四

秋風一夜吹簾櫳玉階零落雙梧桐美人曉起汲金井銀牀  
白露飄衣冷妾心如井長自清願君窺井知妾情

三洲歌

帆張風便三山忽見

梅里詩輯

卷三

四

楊柳枝詞

春寒殘兩日瀟瀟一曲驪歌上灞橋想到嗁烏今夜宿不教  
攀折最長條

塞上

霜落陰山朔氣寒高雲飛盡見鷗盤關門不改秦時月留與  
征人夜夜看

刁斗聲寒內屬來狼烟初息白龍堆樓蘭死後無邊備春草  
連天漢使回

枯魚過河泣

枯魚過河汝何爲使我有淚不得揮

擬古謠

崑崙之西白日粲阿母之居在天半

掃星狼射天狗金華山頭石羊走

里諺

邑中能蠶不爲樹桑邑中多盜乃爲齋糧

效謝康樂石門

結宇臨中阿蒼烟隱微路境幽塵響絕林嶺莽回互層崖美  
竹顯複澗嘉木聚游禽忘外翔松濤駭餘怒歷歷觀衆空萬  
物藹森布晨定麋鹿交夜雜星辰寓窈然耳目喪寂寞非吾  
故

山行

清晨發遐思洗心事游晏緣蘿緬升降顯晦經屢變幽鳥靜  
不飛蒼林互迴轉踪跡窮寂寞耳目曠聞見日夕山水昏疲  
策意猶眷

梅里詩輯

卷三

五

田園偶作

弱冠負奇僻著書在田園聊以適性情非曰敢立言昔聞隱  
君子出爲世所尊如何守故轍卒卒飢與寒古人重始進是  
以端其原苟求不由道千古羞齊門

荒園積羣翠果氣日夕深雲光歇前山共此幽曠心天空一  
鳥沒林靜孤蟬吟風泉響石瀨樵唱聞遠音緬懷若有怡自  
撫邛中琴

歲暮寫懷

藹藹斜日陰栖栖游子顏我衰久爲客履歷多艱難旅食長  
苦饑旅服長苦單遠望聊當歸故園隔蒼山亦有居人心心  
傷未嘗閒但見孤雲出不見孤雲還

落日

落日閉窮巷風來何颼颼沈吟一室間悄然生百憂自傷曠  
浪懷苦爲衣食謀朝看孤雲飛暮見空江流何能坐成老拔  
劍當遠遊草草天下人視我如贅疣

杪秋九月盡破屋先知寒塵甑絕烟火孤身歷艱難虛庭生  
次寥落日照幽蘭一朝犯霜露草莽同摧殘嗚呼負芳質無  
人爲之嘆

### 飲酒

孟冬歲云晏農事告初畢北風隕霜露牀下聞蟋蟀天寒遠  
雲映日沒孤月出閉門命僮僕秉燭埽一室悠悠薄良夜酌  
酒散愁疾

霜落繁星高月出羣峯晴此時飲美酒最能發幽情醒猶惜  
沈痛醉卽忘平生安知天地外水火淪飛精寂然在埋照長

梅里詩輯

卷三

六

嘯懷劉伶

### 答張子冬夜見懷

飛鴻暮南來高風急哀音飄然到吳會告我離居心執書且  
躊躇三復感佳吟涼秋念徂別忽忽窮冬深冰霜被舉原木  
落成空林寒士守鬱抑終夜但孤衾懷君歲云晏思結誰能  
任

### 效謝莊遊東田

高原淨初日耳目寄幽玩離披入林樹冥密隱樵爨游雲斷  
積石烟景蔽清且路盡一水飛風歸衆香散信履從所宜優  
游發深嘆

### 孝陵

鍾山石層層冬夏積冰雪松柏纏陰森熊羆護巖穴鼎湖龍

去遠弓劍闕幽關唯皇挺熙運奮起秉黃鉞一揮破蘄黃再  
舉奠吳越羣雄空鬪爭所遇皆殄滅赤手造區夏率土賴重  
活謨烈貽後人大誥昭史策燕雲旣殷遷豐沛猶漢業至今  
龍蟠基王氣殊未歇臣也草野人不易窺聖域難入都來  
未敢忘一謁精靈儼如在窈窕心目懾梓殿凝玉芝隧道隱  
丹霓萬禩翼休明神哉報豐潔

待范四不至

落日澹清輝幽人在林樾回看往來路蒼蒼翠微沒天高秋  
月空夜午星辰闕之子期不來長歌爲誰發

游崧光

西山鬱奇姿茲峯實爲最孤高上虛無時與雲雨會密生青  
連陰白日半城晦泠泠多澗泉清聲落山背中聞隱高僧靈  
梅里詩輯卷三  
跡自前代至今松林裏飄風出殘唄尋幽理晨策偶憩息餘  
憊歸路迷蒼茫前林鳥飛外

寒夜談遷至

故人越江海細雨連孤舟叩門告飢乏刺刺語不休自從遠  
遊歸中塗歷窮愁豈無相識人埽迹如仇讐腹值今日饑問  
余能食不聞之發長歎誠爲吾道羞青眼古所難況於末世  
求伊余雖苦貧一飯君必留中園翦寒韭糟牀瀝新麴酒酣  
兩耳熱率意成歌謳人生感行樂不醉非良謀

宿董氏宛委山房

中夜虎渡水谿樹初風生颯颯吹哀湍衆山皆有聲深庭久  
無月黯然三四星憂人獨求醉釋此離居情王臨上云  
警拔可傳

汎舟經先生墓下作

西涇汎秋色愛此谿流深蒼蒼二三里出沒蒹葭陰行近先  
人廬悽然見寒林薄暮涼風初蕭颯生哀音清霜下高原秋  
草亦傷心有懷靡絲及佇望南山岑

同柯上人登淡公山房

寒日澹無色曠觀悅蕭條偶從高僧遊興懷陟山椒梅林蕭  
龍象棟宇限層霄淡師開禪扉遂爲人外招丁丁林莽間遠  
見山中樵遊目窮下方始信致身高晏息有餘清靜止心何  
超

寄沈山子

橫山生白雲鬱鬱半空起知君住其下獨宿白雲裏冬月靜  
巖扉寒泉滌心耳嗟余役風塵引領望之子

王貽上云及格

秋夜遣懷

梅里詩輯

卷三

八

八月天氣清草堂轉深僻長河流素影遙遙瀉空碧落葉盈  
寒皋繁星爛秋夕蕭風吹微月竹露夜深白偃蹇獨往來恍  
焉慕疇昔

游雲龍山

迢迢雲龍寺象外懸雕梁千尋虎豹中極視但蒼蒼荒哉放  
鶴亭蔓草生空牆牆空入青山山山次低昂黃河見一曲千  
里極微茫長風正東來當軒走帆檣勢迅不可遏心旌逐飛  
揚南望鳥絕飛惻惻心自傷

踏月期周青士不至

一月當空中繁星忽然滅愛此清夜深逍遙步林樾四郊微  
風止人靜聞落葉期爾無能來幽懷與誰說

十七夜又期周青士看月以子病不至

一夕復一夕有月誰同看豈非愛子故以阻良宵歡光遲影  
猶滿風露流微寒烏鵲屢驚飛想見林棲難迢迢徹深漏念  
爾增長歎

清涼山寺

蒼山樹如蓋乘高御清涼地遠暑亦寒江色明虛廓層崖仰  
萬象古寺崇椽梁眼迷金銀界鼻擁旃檀香白雲照巖穴有  
若日月光極視但長嘯凌風思翱翔

村居效劉伯溫用原韻

林蟬厲秋吟籬犬嚴晝邏柴門莽蕭條人靜不聞唾孤花明  
一枝密竹隱千箇橫琴含餘音幽韻從寡和晨興事桑麻鋤  
草亦清課雖懷棲息志忍使農功破勤生賴甯勉飢寒此身  
大夜久月露高繁螢滿書座右仰觀天宇闊屢見飛星過寂然  
梅里詩輯 卷三

九

久沈思無容此生蹉

謝談黃浮惠鹿角膠

日月自成積不虞爲老基齒疎髮蒼浪氣血行漸衰畏暑恒  
閉門未寒亟求衣著書日一篇思溢文支離對客語未多忽  
忽神欲疲君年長我一榮色胡不移乃知藥石功足與少壯  
追憐我骨髓枯輔我以刀圭所滋重陰陽在補兼鹿糜米汁  
鎔白膠服法固有宜非但益支節輕身且生肌往昔緣山阿  
迅捷猶發機恐遭不遜惡勉後心先馳病來脛力弱竟爲二  
豎欺佳辰昨重九萸菊懷秋筴舉家出登高我獨臥東籬請  
自今日始徵惠君之貽倘能及奔馬終身以追隨

春日歌寄陳學

邇我道兮邇迴石窠岑兮生苔若菲菲兮東望春將來兮未

來美人兮窈窕私屬懷兮心摧心摧兮哀歌情思兮彌多日  
渺渺兮北望君不知兮如何

重渡浙江

越山濛濛越雲黑回首孤城遠無極江南遊子江北歸驅馬  
臨關候風色篙師擊楫呼登舟俄頃不覺臨中流晴烟蕩開  
日影白清光洞見魚龍游長風射帆勢超忽浩蕩無垠駛輕  
疾蕭邑危如一芥浮西陵渺若孤鳧沒人生壯遊不可多湯  
湯江水今重過賦詩擊楫是吾事爾曹白眼將如何

鄭山人浪遊湖海圖

扁舟五湖去烟水生秋風長天出沒杳無際山鳥竦峙洪濤  
中飛流直下五千里爰有大海環其東波連赤日星河通何  
年鑿氣分鴻濛晴光涵蕩菴背黑珊瑚落磔扶桑紅莆田山  
梅里詩輯

卷三

十

人玉爲骨仙掌精凝海中月水湧心胸盡鬱紆山隨筆勢爭  
奇突去年爲我寫古松老幹屈鐵排飛龍草堂白晝懸素壁  
至今烟霧猶濛濛山人浪遊三十載贏得佳名徧湖海他日  
人問覓畫圖眞迹余能識王宰

憂旱

五月六月天不雨原田憔悴無青苗老農窮困飢莫訴欲語  
不得唇苦焦當昔萬歷十七年江南之土皆不毛山川滌滌  
赤日烈昊天降酷同燔燼豈聞斗米盈千錢百物騰價如今  
朝城隅積尸滿溝壑閭家室同逋逃流民嘯聚食無所亂  
形已見當弭消有司置之莫以告猶嚴法令煩征徭往時烽  
塵掩朔漠邊陲震瓦來天驕只今襄洛多盜賊屢斬白馬盟  
中宵東南半壁少舒息賴出貢賦供天朝邦之根本重在是

萬一不惜羣情搖吁嗟黎民痛雲漢囚首垢面爭呼號吾儕  
小人負私歎竊恐旦夕妖星高安得五日一風十日雨使彼  
康衢鼓腹長謳謠

弁山

雲銷杳嶂開吳天松風響盡空山烟幽谿朦朧出雷雨石脈  
橫亘飛高泉時聞唬猿過絕壑復有疎鐘在寥廓巖花笑人  
來何遲野草無春雪光薄森峯往往潛出沒白石無光背峯  
落逶迤仰見萬古情身披冷秀空中行悠然虛谷應清嘯月  
明何處吹瑤笙

荒原

荒原秋草積日暮獨行歌野水隨天盡寒烟入樹多一身今  
老大滿眼又于戈北望烽塵裏驚聞旅雁過

梅里詩輯

卷三

十一

與范遵甫

十年成往事長嘯激悲歌搖落當秋甚蹉跎奈老何風塵孤  
劍冷天地一身多更念幽居者衡門掩薜蘿

湖上別脩安上人

水遶禪關外烟生客寓中久居渾似舊獨醉未知窮一葉驚  
秋客孤山別畫公歸舟當有夢明月此時同

自放

自放人情外吟惟抱膝多年華坐搖落天地復如何夜雨深  
荆蔓秋烟冷薜蘿衡門問奇者載酒一相過

寄內

白門楊柳樹蕭颯在江關故國幾回夢清秋萬里山遠懷應  
有淚久客且無顏歲晚愁歸計冰霜道路艱

渡錢塘

水驛渺難求，風帆颯未收。  
江山開一望，吳越在孤舟。  
客鬢逢秋換，鄉心近暮愁。  
浮沈無限事，觸目羨沙鷗。

寄張深之

辛苦張司隸，朝廷舊從臣。  
寄身長水道，乞食大江濱。  
野服疑山客，方言問土人。  
秋風莫歸思，此地有鱸蓴。

湖上訪顧山人

北望隱蒹葭，伊人水一涯。  
琴書尋暇日，舟楫問鄰家。  
樹倚藤枝密，山奔屋角斜。  
經時不出戶，鷗跡滿平沙。

答周青士

南國存三戶，西京賦七哀。  
嘗聞杜陵叟，未見洛陽才。  
硯古遺銅雀，書亡問玉杯。  
不知題鳳者，今日爲誰來。

梅里詩輯

卷三

三

石城晚眺

客心正搖落，獨上石頭城。  
天遠垂垂下，江寒混混平。  
愁兼多病日，老作異鄉情。  
況值秋風後，清砧急暮聲。

人日懷周青士在皋亭

皋亭何處是，風雪念離羣。  
白社違人日，玄關閉子雲。  
有時清梵絕，不盡暗香聞。  
此夜傳心法，安禪過漏分。

冬日

蕭條西北風，吹斷北來鴻。  
歲月客程晚，冰霜天宇空。  
有時歸夢裏，盡日處愁中。  
昨夜傳鄉信，烽烟又浙東。

送朱職方昆弟還舜江兼問越中知己

雪滿山陰路，舟從此夜歸。  
寒江逢舊臘，明日換征衣。  
一二故人在，飄零佳訊稀。  
所嗟愁臥者，心與脊合飛。

別陳臥子

南國生芳草懷歸正此時  
流人千里恨博士五經師  
江落曹娥水山空夏禹祠  
還將禾黍淚灑別問何之

寄金陵知己

當時爲遠客長缺不歌魚  
身與羣公接門無一日虛  
江山雄白下人物近黃初  
自賦歸來後交知肯念余

清河縣

小縣無城郭河流到縣門  
客舟經近市漁網集空村  
饑饉年頻告逃亡屋半存  
惟餘譙鼓在猶是警黃昏

泛舟

涸流成小泆道阻意如何  
白日浮孤櫂滄浪獨浩歌  
楓林依水盡雲物近秋多  
早晚山窗下寒衣翦薜蘿

梅里詩輯

卷三

三

同友人集白雲山樓

路入中峯峻松門一徑分  
危樓延萬象尊酒對斜曛  
月色開青嶂鐘聲過白雲  
曾聞上方寺鸞鶴自爲羣

懷黃十三伋

頗謂離家慣誰知旅服寒  
春風連夜雨伋也獨長歎  
能事傳王宰佳書報謝安  
所思雖未遠時復念加餐

送弟庭之廣州

貝齒明戎服行光僕隸先  
枕椰千樹雨瘴霧百蠻天  
蟻附懸山馬蛇行泝紙船  
含悽悲遠道筋力爾頽堅

西風黃葉落天地正窮秋  
遙役當殘歲飛帆入亂流  
日南頻墮鳥海上遠辭鷗  
不待炎蒸苦應思馬少游

送李孝廉遊京口

故人千里別五月泛微茫客夢應無間仙舟幸不忘山形起  
黃鶴江勢抵丹陽想涉金焦頂題詩滿上方

四十初度

不才吾老矣萬事一蹉跎今日尚如此他年知若何空囊初  
罷酒樂歲且狂歌每欲尋巢許無從訪薜蘿

贈胡客

同作原嘗客當時氣不羣飄零千里隔生死十年聞山樹消  
春雨江城起暮雲霸亭逢醉尉誰識故將軍

村居

獨樹寒烟外孤村流水間偶隨花草去遠逐漁樵還川暝罷  
垂釣日斜長掩關何年事高隱歸臥鹿門山

周青士云  
全學輞川

自感

梅里詩輯

卷三

十四

窮老心逾拙羈縻鬢已斑文章身後事邱壟夢中山遂欲東  
浮海不然西出關桃源如可問但去莫須還

江亭遇舊

老畏干戈滿愁聞羽檄頻鶯花射堂夕風雪故園春泉下悲  
先帝人間識舊臣空將垂白淚嗚咽對沾巾

送客還山右

春草太行山人一騎還夕陽前路遠離夢索居閒鳳舉今  
誰匹鴻歸不可攀所悲流水意千里送潺湲

將之南中留別里中諸子

天涯今日始萬里斷蓬飛有淚彈長鉞無顏製短衣星晨南  
紀遠鴻雁北行稀盼得羊城到吾身亦似歸

月

涼烟吹片影出沒洗高林永夜星俱靜寒江水共深天虛秋  
自鑿光滿桂無陰獨有關山客孤懸萬里心

客感

千里江南客冬深未授衣愁將雙鬢改寒共一燈微去國輕  
生死依人畧是非鄉園更搖落何處可言歸

越中送顧偉南還雲間

相憐俱在客感別此心同前路夕陽外行人春草中天長迷  
去楫江遠泣羈鴻怨入華亭鶴依依向北風

辛亥

殞血甘戎首羣然激異同黨人分洛蜀封事決雌雄法紀蔑  
莠外朝廷水火中憂時方豫歎流禍此焉窮

落日

梅里詩輯

卷三

五

落日凭高望離懷起暮愁山光搖暗水樹色隱清秋身世終  
何託干戈卒未休飄零一舟在將事五湖遊

薊北

薊北十年來烽烟暗不開秋高邊馬健風急塞鴻哀白髮將  
生鏡黃金未上臺徒憐憂國計長屈幕中才

感事

歷歷當年事長吁感陸沈立身移晚節謀國痛初心火照甘  
泉近魂銷雪窖深空將楚人淚一墮涉江吟

秋夜

思想不可見微月在西林霜葉明秋淚涼蛩語夜心重門聽  
漏盡孤燭閉窗深最是愁難遣沈吟獨至今

送杜總兵父子鎮鳳陽

虎竹傳新詔龍庭想舊功邊隅推節鉞征伐問英雄地重尊  
陵寢天恩眷沛豐廉頗猶善飯杜預復臨戎建策君臣合千  
城父子同六師分汗馬雙夢叶非熊養士千金散懸烽萬井  
空鈴樓開樹左禱祭列軍中銘卽燕然石碑仍象郡銅饒歌  
聞不日世美錫彤弓

觀海

蕩蕩方輿外滔滔瀚海中上連天闕遠下極地維窮日月釐  
晴煥樓臺蜃氣雄千檣鯨鬣動萬國島門通方丈瀛洲北扶  
桑日本東盈虛終渾渾今古一濛濛目極茫無象心搖浸若  
空神仙如可問弱水會凌風

登北固甘露寺

凌雲亭畔倚崔巍明滅維揚望裏開南國至今遺寺在西風  
梅里詩輯 卷三 六  
不盡大江來日生滄海凌晨見潮過金山向晚迴指點孫吳  
舊時事馬蹄石跡半蒼苔

答范遵甫

濁酒空懷田舍歌百年身世半蹉跎人歸野徑殘陽盡家在  
寒塘落葉多好竹不嫌愁裏看名山竊喜夢中過餘生欲逐  
漁樵去白髮于今奈老何

乙酉三月十九日同朱近脩登崇教寺塔

目力遙從象外求烽烟何處見神州叫闌無路排閭闔分野  
誰傷畫斗牛萬里爲家空肆涕三春去國阻歸舟驚心坐覺  
諸天近不盡登臨此日愁

漫書

竹牀長日蔽烟蘿落魄空懷學劍歌壯志不隨雙鬢改百年

又見一春過風吹芳草愁中積身到青山夢裏多爲問樵蘇  
更何計天涯無處不干戈

南中雜興

千年鐵鎖不知春六代興亡迹已陳自惜割江曾有賦只今  
籌海豈無人龍蟠地勢聲靈壯馬渡衣冠禮樂新未見夷吾  
憂莫釋欲將屠釣問風塵

授鉞仍煩廟矢頒空勞鎖鑰倚重關千艘秔稻連江急十里  
烟花近市閒夜月旌旗五馬渡秋風草木八公山南來烽警  
嗟何甚有誓中流未可還

直北天垂路不窮傷心無計問來鴻兵徵往歲占朱厭日氣  
高秋掩白虹秦塞忽驚三月火漢家空待貳師功可憐京國  
淪戎馬四海生民鼎沸中

梅里詩輯

卷三

七

長城萬里羨當年楚澤軍容蓋世傳三月晴風高戰鼓九江  
春水下樓船韓彭心事應難論李郭勛名不易全漫道勤王  
師獨正江南處處起烽烟

淮海聊甯燕雀居風高鼓角建牙初寒凌畫戟秋陰重雲壓  
孤城夕照虛西蜀諭通司馬檄中山謫滿樂羊書將軍面矢  
誰堪數樽俎論功計已疎

投効無端只讀騷傷心野老屬吾曹千官遠扈思秦駐一旅  
先驅作董逃周道秋風行黍稷漢宮春雨長蒲桃化龍五馬  
知何處海燕東飛問伯勞

亂後寄友

落落吾猶空一身避亂獨喜家長貧水懷遠意竟歸壑山負  
好顏終向人衡門之下釣竿侶書卷以外茶甌親爾將何時

習真隱先報白鷗爲爾鄰

竹夜

林風吹竹竹露微幽人隔竹開柴扉星河夜宿草堂靜蟋蟀  
暗吟秋月輝疎鐘杳杳坐來歇流螢奕奕停還飛石牀一枕  
破清夢寥落半生無是非

薛生赴隴

猛士獨當關三秋烽火閒榆林千里戍高枕月明閒

去越

步出越城門回看越城樹久客成故鄉徘徊不能去

邗溝夜泊

落日嚴城閉邗溝長暗潮廣陵秋月苦歌怨木蘭橈

塞北

梅里詩輯

卷三

六

塞北多戎馬軍中尙鐵衣相逢秋鴈盡未敢羨南飛

新柳

章臺遲日早葉葉感微心不怨無人折春風力未深

會稽竹枝詞

秋風秋雨正淒淒荷葉荷花香滿溪越女蕩舟愁日暮歌聲

盡在若耶西

金陵懷古

景陽宮

鍾山雲氣繞飛龍空外參差紫閣重想見當時殘月下宮人

初聽景陽鐘

臺城

清霜落葉滿臺城秋兔山基野燒平今日西風何限柳蕭疎

猶有故宮情

含章殿

烟草萋萋野色新  
晚來驅馬見行人  
不知何處含章殿  
滿地梅花雪外春

臨春閣

渺渺孤雲帶晚鳴  
空溝流水咽寒沙  
臨春閣上新聲歇  
管井風埋玉樹花

烏衣巷

水滿秦淮長綠蘋  
千秋王謝已成塵  
春風燕子家家入  
無復當年舊主人

桃葉渡

南國愁魂寄水湄  
空江舟楫望中疑  
只今桃葉無消息  
惟有

梅里詩輯

卷三

九

遊人唱竹枝

莫愁湖

蒹葭一曲隱平沙  
空憶新聲到水涯  
碧石清江相映處  
如今不是莫愁家

鍾山

寒江秋靜水無塵  
栖隱當時有二倫  
爲問山中明月夜  
草堂猿鶴忽何人

宮詞

仙掌高懸月上初  
晚來風急閉金疏  
更催內苑傳紅燭  
夜待官家讀諫書

芙蓉水殿御河東  
香氣涼生白露風  
十二樓臺今夜月  
微聞天樂在空中

金樞月落露華微  
仙漏沈沈散直歸  
燈下不辭鍼指倦  
秋風將賜玉關衣

上林春酒進醞醅  
醉倚新恩倩帝扶  
翠輦不登遮袖去  
兩行銀燭盡宮奴

禁中春樹藹晴烟  
朝罷簾聲下九天  
官局進呈新鑄好  
六宮齊賜草書錢

十里芙蓉內院秋  
涼風先到殿西頭  
君恩不是銅溝水  
那得深宮處處流

紅顏何必怨春風  
抱得琵琶曲自工  
邊郡未和多遠嫁  
不知誰在漢宮中

故宮

紅葉依然出內河  
御橋流水晚來波  
空宮一閉無年月  
每到

梅里詩輯

卷三

三

春來積雪多

漂母祠

一飯當年報所知  
王孫今日更何之  
平生自歎無知己  
千里來尋漂母祠

露筋祠

野岸分流截海垠  
安歌誰復賽波神  
孤舟夜向祠前泊  
商女挑燈說露筋

揚州

香璫珠匣閉黃沙  
泉下依然望翠華  
芳草離宮三十六  
春風吹滿玉鉤斜

滄江如帶遶城斜  
煬帝行宮遍水涯  
二十四橋人去盡  
月明空照廣陵花

亂後得張子書

沁園秋草舊回車，惜別西湖歎索居。  
萬里河山經百戰，十年重到故人書。

秋怨

芙蓉花落水無香，南國秋來夜有霜。  
邊月只將離夢遠，相思河外是西涼。

維揚逢張子

輪蹄自送出吳關，楚乙燕鴻信不還。  
誰料十年兵火後，故人今日在人間。

客中九日

細雨成陰近夕陽，湖邊飛閣照寒塘。  
黃花應笑關山客，每歲登高只異鄉。

沈山子云  
不失唐音

梅里詩輯

卷三

三

送周生還句章

天回西影落星河，一曲離情泣濯歌。  
莫上南山望秋色，北山山外白雲多。

送徐文果入粵

庾嶺南邊去路長，千村濃葉暗桃榔。  
莫教烟雨樓頭望，自引愁心入故鄉。

宿眞州

烟靄蒼蒼接水明，商船唱徹棹歌行。  
平沙夜久寒潮上，又聽江千起雁聲。

訪陳徵君繼儒

五柳先生久挂瓢，七松居士住山椒。  
秋原踏葉無深澗，洞口

雲寒長藥苗。

晚春卽事

青草之外水無涯  
雨鷺晴鷗交遠沙  
開門汲水見村女  
紅白


花中春數家

王介人二槐詩存  
紙草堂集二槐堂詞  
苑春秋俱遺  
盜溺於水  
後得朱竹垞手鈔詩一帙  
何太初選錄詞  
兩卷僅十之一  
第庭序而梓之又著有秋扇記榴巾怨  
等傳奇今皆不可得而見矣  
孫融識

梅里詩輯

卷三

三



山中春遊集

王介人二槐詩存  
紙草堂集二槐堂詞  
苑春秋俱遺  
盜溺於水  
後得朱竹垞手鈔詩一帙  
何太初選錄詞  
兩卷僅十之一  
第庭序而梓之又著有秋扇記榴巾怨  
等傳奇今皆不可得而見矣  
孫融識

梅里詩輯卷三終

梅里詩輯卷第四

里人許燦衡紫編

朱一是

一是字近修號欠庵崇正壬午舉人海昌人徙居梅

里有為可堂集

詩話孝廉負經濟計偕入都欲上書言事而時已不可為矣國變後逋逃海上飢寒顛沛百折不回居吾里東偏時桑種竹顏其門曰十畝之間時寓僧廬披緇衣講學或勸之出不應貞固之操恒於詩篇見之早年名重復社在吾里為敬盟之一又與范遵甫屠助齋稱三友古今詩才情富麗氣體雄秀文集六十餘卷論議最佳

梁父行

出處各有理賢愚不在形巢由寶性命堯舜拯黎民湯武法

黃帝仁義興甲兵庖漁奮伊呂依主成功名公且管蔡誅禮

梅里詩輯 卷四

樂輔昇平尼父不遇時栖栖魯衛行

君子行

君子愛惜禮義舉足莫自輕小人愛惜氣勢朝夕徒營營兩

心豈必相契道路常同行造物不能齊物涇渭分濁清

民兵行

府帖昨日下午縣吏徵民兵裹頭穿窄服白挺事長征黃須邊

將帳中坐飲酒擊鼓衆賓賀三軍擁盾白日臥酒醒臥起眼

茫茫獨驅民兵投戰場民兵遇敵一朝盡跋扈黃須又索糧

射虎行

有駁如馬鋸牙食虎食虎出聲皇皇伐鼓解人不如駁見虎

躑躅其心則然匪力不足解彼美丈夫縱送馳驅虎在南山

取供庖厨解三魁白而瘠黧黑而肥再發得之徒負以歸解四負

者遷延途人爭前奪虎獻公丈夫瞿然解五瞿然復怒吾不射  
矢同爲途人奪虎易耳六解

懊儂歌

乍發江陵舟欲向真州艤儂在舟中行三千三百里高桅鐵  
鹿子風緩布帆低一舟接一舟同插小黃旗縱有順流船不  
如板屋好懊惱使儂老

雀飛多

雀飛多虞人伺飛張雀羅雀伏不飛張羅於何雀兮雀兮奈  
飛多

雞喔喔

雞喔喔爭啄粟出簷逐雄離披雌者伏

桃葉歌

梅里詩輯

卷四

二

桃葉正開時離離桃子結子熟生桃蟲蟲還食桃葉

烏生八九子

烏生八九子蹲蹲習飛不及尺老烏死後鷲烏破巢攫之食  
我雛強半被攫棄骨委原隰尙有二三雛離披隨巢墮卑樹  
里中小兒探雛斂其羽安置樊籠中饑呼歷朝暮嘗思老烏  
在時勞苦愛護張口受哺安居無念懼聞鬪一夜吹嚴風羣  
鳥入河中黃雀細小化爲蛤蛤命依水水乾恐不得活我雛  
謂雀爾雖得活終陷泥不如雛脫籠去還能飛

結交行貽胡四陞之

生平不滿百戚戚憂終日謀事常苦疎結交常苦密交密夫  
如何如以膠投漆不能復相離況乃三歲隔故人江之南一  
水渺何極近日鯉魚風吹浪過江北我獲雙鯉魚提刀剖魚

急腹中無素書擲魚長歎息

春日書感

一歲無兼春終日不雨且纔挹朱華紛忽聆綠陰徧蒼羽豐  
林鶯乳音改梁燕對景感逝辰撫躬愴頽算投閒物累多息  
老精靈散伏枕違寢興閉門卻理亂時衰邊壯心境轉尋初  
願白頭非偶然空復少年羨

暮渡曹江

遵塗無宿館泛舸曹江千靈暉頽西林舒魄吐雲端商賤送  
玄夕柔櫓盪微瀾翔鶻下高樹置身擇所安如何遠遊子彌  
感行役艱零露潤衣薄能令中心寒莫采芙蓉花何論瀟湘  
蘭古有式微詩申詠增長歎

濟寧朝發

梅里詩藪

卷四

三

明星猶在天僕馬紛四出征夫吐蓐食倉皇事行役客音五  
方殊各自嘯儔匹徒御貪朝程健騶任飽力絲絲驛路馳野  
外空無物彌望莽蕭條獨對晨光逼遠樹號雄雞似有人烟  
集百里一茅檐喜如到家室

自魏嶺攜家還通德里

鬱鬱山阿深經行盤十里繁花照人明鳥聲出花裏紅橋瀉  
春流響輪激春米溫風散物華阡陌錯繡綺客子久倦游攜  
家尚轉徙妻孥行路難欲前卻迤邐盤石招人憩遙睨暮雲  
紫歸來月出林幽庭淨如水

寓棲真寺

積雨欣初霽東臯試遊步林色散餘陰融融日亭午鳥鳴悅  
舒翼竹影森當路落葉徑尺深設設屐聲互山花明杜鵑妍

葩含欲吐陽月地靈迴根芟撥陰瓦撫膝坐高岑涼吹雲光  
度澄然心氣空幽吟起微悟

述懷

殉名奮烈士斯飢貞季女舉世笑其愚彼愚竊自許寄懷不  
苟同端操良有取游步矚郊畦離離登禾黍人慰願豐心傷  
貧獨羈旅何由通精靈蒼昊降粟雨我聞聖人徒顏原嗟終  
窶當時端木儔結駟遜高矩

高梧山望遠

晚眺極東隅舒懷接爽塏客身若虛舟揚帆游滄海烟波越  
萬里獨棹歌款乃天勢遠漸低積水生鬣鬣高雲淡以馳山  
容青不改潮汐蕩虛空蒼茫孰主宰懸足濯滄浪澄然煩結  
解須臾月出林衣帶寒光在

梅里詩輯

卷四

四

乙酉秋七月別內

入門無可止出門誰爲投萍散江湖風木落天地秋況當陰  
雨霑河水滔滔流艱危日已迫欲渡無行舟人生一世間縹  
渺同輕鷗羽毛自愛惜泛泛載沈浮丈夫有志節豈爲妻孥  
謀

卜居梅里

夙齡寡身營豪宕極游衍狂飈吹斷蓬終悔植根淺如彼飛  
飛禽悲鳴故巢燹一枝栖止艱凌雲羽力短梅里亘脩河東  
瀉逶迤轉宥啟幽人宅方池楹楯展槐柳參垣藩麥黍被隴  
阪家室聊以安衣食得所遣豔陽紅藥妍商秋素魄滿永怡  
琴書情偶豁林臯眼寤寐考槃歌消散式微慙莫思少壯時

有情空縈綬

脫兔豐草棲驚禽藂藪避絲蘿善附物冉冉修柯繫精靈賦  
生民取舍具高智處僻無繁營就卑卻危慮折彼鴻鵠羽恬  
茲鷓鴣憩綠陰桑者閑黃茂耕夫悴聊有經營勞薄遣衣食  
累人生如飄塵去住罕定位歧路感異鄉久居仍故地惕惕  
風雨侵臺臺網繆計莫謂流離人悠悠忘砥礪

古意

閭闔西北開天馬蒼黃來大宛汗血名倏見龍之媒飾以黃  
金勒絡以紫絲緤驍騰實天廐頗矜上駟材願言效馳驅努  
力蕩塵埃漢文旣偃武捐棄同駑駘奄忽不一御伏櫪長鳴  
哀

初夏

初夏雨乍晴秀色平林樾濯濯遠山淨渠水流未歇東臯耕

梅里詩輯

卷四

五

一犁衆鳥鳴情悅感茲造化功羣物互生發

同范遵甫夜望

大地浮空虛滄海一萍荷不知空虛外元化更誰秉寒潮去  
復迴叩舷發深懍

首夏郊步

獨居幽懷舒羅衣單始換策杖遵微行平臯縱遐眎林花落  
已稀谷鳥嬌聲變薄炎吐朱暉晴絲空影亂物華悅盛時芳  
陰蔽遙甸竚立久忘疲返景崦嵫餞暮涼遠靄生青紅界天  
斷

種魚

田農農種禾海農農種魚夏種冬收成勞省利則俱大魚若  
曲陵小者徑尺餘滋息造物理本業衆所趨我來食魚美將

卜澤畔居慙慙告老農農言姑徐徐近日多風波獲利不如  
初

夷門歌

虎狼吞併古所聞救趙卻秦成大勳平生結客魏公子激烈  
豈爲平原君朱亥狗屠感意氣侯嬴老人識名義臨風勿頸  
捐一軀赫赫精靈動天地恥不帝秦亦徒然蹈海虛傳魯仲  
連

登雞鳴山謁功臣廟

乾坤草昧飛神龍羣雄什百風雲從霖雨已沛霹靂過扶桑  
日出光溶溶溶溶溶光照黃金殿褒勛排列承平宴丹書紫誥  
寵眷濃帶礪河山誓無變雞鳴壇宇高巍巍大炁血食祠官  
來兩廡木主暗無色上有六王生面開開平袞冕年最少亞

梅里詩輯

卷四

六

坐中山同主廟岐陽鄧沐皆端拱白首湯公解頤笑莫怪湯  
公獨白首富貴誰能兼壽考盈虛造物忌居成古今只數汾  
陽叟我聞開國多功臣驅元平夏何艱辛當時聖意深難測  
高下論定非繇人祠前歲久老榭榭陰陰白日如幽谷夜深  
風雨鬼神至穎公長歎韓公哭君不見芒碭山中赤帝子韓  
彭黥布功高死白水追褒舊佐恩雲臺不進歛與援功罪悠  
悠安足定乘時青雲且致生天生英雄必有用豈能屈首長  
沈淪近時朝廷念夙昔幾回明詔開山澤晉火年年弔介推  
周封處處求能釋

鄴城

鄴城豪華甲五都三臺復道橫雲裏可憐魏武霸圖雄只今  
但見漳河水漳河東流朝市變蔓草芸黃滿荒殿金鈿蝕土

溼螢飛古瓦秋霖洗銅硯  
悵望疑陵斷還續鳥噉落花哀  
怨促宮伎烟消總帳寒馬首  
靡蕪散空綠

黃梅謠

黃梅時至梅子黃作晴作雨  
天無常老夫舊書百回曬  
細君寒衣傾出箱移書檢衣  
擾碌碌幾忘衝雨倒茅屋料  
材入市竟缺錢出村鳩工工  
畊田解衣攘臂自勞役小婢  
束薪兒抱石曲木爲梁繩結  
戶頽垣未甃壁先補旁皇偷  
息過今年再勿霖雨哀告天

哀梁烈婦長歌

易水梁公以  
悼夫人也

商郎自古睢陽地張許殺身事  
會記寂寥千載此孤城百戰  
拒賊有梁生崇禎欲未亂不休  
朱眉銅馬橫神州督府遺遙  
大將走郡縣官人禦徒手梁  
生有婦抑何烈佐夫嬰城心  
似

梅里詩輯

卷四

七

鐵椎牛市酒激戰士曳版潰營  
萬賊死可憐援絕城西傾大  
厦誰能一木撐此時刀鳴鼙鼓  
咽蕩蕩蒙蒙盡流血梁婦登  
樓縊且炬赤烏飛空薪具舉芳  
魂夜越武津關雙忠廟前拜  
張許張許當日死誰同屈指南  
雷有數公豈如梁家三十口  
去從夫人矢不負黃泉冤鬼哭  
成羣將相當權若罔聞功罪  
悠悠太顛倒棄置河山疾如掃  
哥舒夜潰潼關開趙北燕南  
賊騎來一朝忽報長安破疑碧  
池頭祿山坐世事興亡付流  
水唯有商郎烈火常留天地裏  
此火非偶然一舉三千年昔  
日曾燔宋伯姬卽今烈名梁婦  
垂松柏商郎高樹碣鬱攸餘  
光爭日月居民尙說白衣人昏  
夜依稀見城闕

白衣見城闕  
商郎實事

聽柳生敬亭詞話

海陵柳生會稽住騎鶴復上揚州路  
方冠闊帶白須眉相逢

慷慨歷朝暮柳生滑稽口難量滔滔今古胸臆藏淳于不醉  
荒淫酒曼倩豈羨侏儒糧場來會客登華堂衆中長揖意氣  
昂虎皮高座凝思長突兀一聲震雲霄明珠萬斛錯落搖似  
斷忽續勢縹渺纔歌轉泣氣蕭條簷下猝聽風雨入眼前又  
觀鬼神立蕩蕩波濤瀚海迴林林兵甲昆陽集座客驚聞色  
無主欲爲贊歎詞莫吐久之聲歇情未已明月逾牆過廊廡  
此時引酒問柳生知生姓名著帝京游俠五陵賤裘馬笑談  
三輔凌公卿金張甲第拂衣去衛霍高門倒屣迎崇禎欲未  
山河變楚尾吳頭半隱見江夏曾爲黃祖賓石頭還作桓溫  
掾殺人如草刀如霜恩威頃刻命無常嬉笑怒罵三寸舌保  
全垂死何多方自從江南再中兵將軍逃散平章行貧賤隻  
身老雲壑山僧野叟同幽情潦倒江湖閉雙目悲來獨對西  
梅里詩輯

卷四

八

風哭惟我知音得爾心豈是雕龍與炙轂

雨中過婁謁梅村吳師書堂論詩卽事

秋風烈烈秋雨霑夾城烟樹陰沉沉梅村主人雙抱膝延客  
聽雨書堂深主客相對驚皓首天涯慘別十年久世路傾危  
歷方盡太行孟門几席有昨年驅馬長安道貴游愛少不憐  
老未契何須托後生積薪任宦任顛倒鴛班三百有六十騷  
壇珠玉無人拾高調從來和者難陽春一唱空京邑奚囊驢  
背句必工燕昭臺下多悲風故老尙談天寶事新辭欲擬連  
昌宮九門重開車馬逐十陵久閉草木禿靈臺獨有相如渴  
鹿車難免步兵哭千秋萬感一聲吞不堪風木更銷魂南歸  
正值尊鱸美偃仰還尋舊日村一吟詩一酌酒酌酒不逢高  
陽徒吟詩堪比杜陵叟杜陵之後風雅絕蛙鼓鴉鳴爭巧拙

近時高華推四傑邊徐何李詞源決山左更數白雪樓江南  
莫如王弇州弇州梅村一梓里後來者勝投袂起冥冥思理  
鉤重淵爍爍才鋒破堅壘早年題雁南宮冠承恩直上明光  
殿搖筆文章動至尊九州萬國傳寫徧爾時芳齡容貌殊清  
眉爛目頤未鬚抵掌提衡湖海士是也不才謁路隅罷駑一  
從值九方逐電奔風瘦骨強至今低頭甘伏櫪不同凡馬受  
羈韁盈虛自是造化理滔滔日月如流水三十年來天運更  
百物誰能兼角齒人生有情亦太癡盛時胡喜衰胡悲卽今  
風雨有如此得不書堂共詠詩

黃雀行

江南少年彈黃雀右手探丸弓左攬側身睨視長林間樹杪  
初驚一丸落一雀落地羣鳴哀飛飛東去西復回顧此誰能  
梅里詩輯 卷四 九

惜同死翺翔并望金丸來少年攘臂擬相向野客爲雀起惘  
悵慙慙長揖呼少年忍使靈禽一朝喪少年首肯弓插韃黃  
雀舉翼何翩反古來雖有雙環玉他日毋煩來報恩

雨不已

比屋斷人行虛窗暗不明浮烟棲岫重急水壓隄平風黑江  
豚躍陰寒野鶴鳴曉來雙鬢雪更逐旅愁生

九月同秦公拙人遊審山

寺起碧雲裏人行黃葉中聽來琴在御飛去鶴橫空光動千  
山日清攜兩袖風大夫能作賦更讓楚才雄

秦京山人

四月

四月天難測一時晴雨并麥岐妨曉步蠶舍忌鄰行遠水通  
溝暗濃陰接樹平陌頭相勞苦漸得老農情

憫亂

到處傳烽烈，斯人生事微。棄田仍有稅，勞織更無衣。夏屋鳴鴉毀，荒原草蔓腓。可憐經戰伐，新鬼哭何依。

妙峯庵卽事

精舍憑高出，蕭蕭響竹颺。徑深林避日，人靜樹爭潮。雲洗山峯峻，寒添海色遙。孤帆動几席，萬里欲相招。

郊飲

萬里兵猶動，三年客竟歸。偶尋芳草路，因見落花飛。野燕隨風側，溪魚得雨肥。悠然堪獨醉，惜與壯心違。

還過爲可堂舊居

四壁蕭條外，平蕪卽戰場。殷勤逢父老，涕淚滿衣裳。白日扃荆戶，青燐照草堂。鷓鴣聊可息，慙愧賦靈光。城郭盧舍半成瓦礫，余居獨存。

梅里詩輯

卷四

十

麗京戲賦有靈光歸然之句

歸濤溪雜詠

喪亂人從老，中間關道已窮。有身慚故舊，無淚哭英雄。投筆心仍苦，登樓賦詎工。歸來唯獨寐，多病畏秋風。

薇細宜山餓，鷗輕愛水清。飢寒大爲累，妻子又隨行。伏枕經年病，開門卽世情。最悲公府辟，猶上老夫名。

張家灣暮泊

去國情何極，蕭條并在秋。荒烟依古集，野火上高邱。生事風塵老，羈心歲月流。所嗟人萬里，隨處有孤舟。

諸將

諸將新開鎮，東南役未休。黃金空太府，白版幾通侯。帳冷三江月，弓堅百戰秋。登樓吟獨客，何處托荊州。

寒食舟行龍山

萬里還家日三年異地心  
山花飄客帽林鳥識鄉音  
極目村烟冷迴腸溪路深  
俄聞野墓哭吾淚亦沾襟

大風雨登甘露寺同葉思庵

古寺新碑在天留第一山  
亂離重寓目風雨亦開顏  
垓鶴鳴陰健江豚舞浪頑  
浮沉應未已鄉國幾時還

憶二王子自吳歸楚

平原細雨鵲鴿飛砧急  
高城木葉稀秋色淨如吳  
地練暮烟寒上楚臣衣  
江鼃彭蠡衝迴浪塞雁衡  
山翻落暉分手河梁終憶  
汝陽臺渡口一舟歸

冬日風雨後作

感栗西風帶雨號蕭條晚  
霽眺平臯宮聲律轉黃鐘  
正兵氣梅里詩輯

卷四

十一

星懸太白高高出處十年  
雙鶴鬢死生千里一鴻毛  
行吟坐嘯愁無極天問竄  
須續楚騷

送袁重其歸吳門

詞賦西京起盛名歸舟到  
處有逢迎水平寶帶芙蓉  
落山老靈巖橘柚生娃館  
月明寒夜色蘇臺木脫動  
秋聲鹿門亦在空城裏坐  
對妻孥不問兵

維揚同社聽濤吟屬和

湖上邗關水氣雄  
重看女市萬燈紅  
春風楊柳興亡後  
宵月樓臺隱見中  
四海弟兄長夜醉  
一時詞賦小山工  
不堪白首天涯客  
年少猶憐我調同

客中聞杜鵑

蜀魄嗁殘漏已稀  
哀音清切感心微  
深更獨立夢何處  
每夜

暗傷人不歸芳草如愁將滿地落花非淚亦沾衣明朝空見  
枝頭血依舊春山寂寞飛

北塞

居庸高望極龍沙野戍蕭條對日斜代北重關飛白雁京西  
古鎮出黃花穿河萬里猶秦塞絕漠三城自漢家苦戰當年  
推衛霍秋風千載起悲笳

淮望

憑虛一望幾徘徊暮色輕烟萬里開滄海遠帆多北轉黃河  
穿塞自南來雲邊豐沛蟠龍氣樹裏彭城戲馬臺澤國關山  
連二楚英雄遺畧感羣才

登宣武門雜興

天際燕臺越客登帝鄉極日彩雲興關河秋色二千里風雨  
梅里詩輯

卷四

七

冬青十二陵洛口赤眉金鼓動終南黃髮玉書徵中原事業  
需匡濟誰許尊鱸慕季鷹

京口遇兵

江水蒼茫殺氣并淒淒畫角戍樓聲舳艫夜月中流斷羽幟  
秋風隔岸明大將營開楊子渡健兒馬出潤州城關門老客  
頻相戒湖海於今罷遠行

同顧修遠嚴方公孫孝若遊虞山

輕舟十里泛平沙雲外虞山一半遮堤勢遠迴言偃墓草痕  
青入仲雍家野泥初圻未開筍溪雨欲流將盡花乘興不辭  
今日醉此身誰記在天涯

初入都雜賦

關門纔喜出驕兵誰問懸軍絕塞營上聖幾年臨便殿諸公

何日作長城衣冠南北愁分部烽火東西逼二京聞道哥舒  
新報警潼關羽檄夜催征

金陵感古

秦淮歌舞更誰家河上垂楊起暮雅往事六朝餘涕淚幾時  
三閣變桑麻長江險失韓擒虎晉井春銷張麗華惆悵南州  
風月夜不堪重唱後庭花

溪上

溪上茅廬水抱東薜蘿徑小少人通高低白雁秋雲裏開謝  
黃花夜雨中夢友不辭千里遠著書獨對一庭空倚門愁望  
平原樹萬葉蕭蕭下朔風

淳化嶺

淳化岡前一度遊關門咫尺思悠悠山風山雨隨時變江草  
梅里詩輯

卷四

七

江花向客愁月暗空城三閣夜霜寒古木六朝秋啾啾衆鳥  
投村宿汗漫征車苦未休

送閻伯北歸

故人驪唱別河梁楓葉霜摧滿地黃有限路程雙足健無多  
行李半肩忙青山皓月吟逋客白骨陰風哭戰場從此高岑  
休晚坐孤雲北望淚沾裳

當湖登弄珠樓遠眺同陸雯若

萬頃澄波百尺樓九龍迴繞戲珠遊地從天目分形秀水合  
滄溟積氣浮挂席夜通三泖月開襟曉帶五湖秋眼中浩渺  
情無極城市原來近十洲

謁陵

日月山陵麗乾坤德澤遙地靈龍虎會王氣鬼神朝百戰功

纔定千年祀不祧衣冠雖葬帝徂落尙悲堯石馬寒松嘯丹  
臺瑞霧飄草茅瞻拜肅百鳥奏簫韶

清溪閒居卽事

村老人風澹幽棲心自安已無妻子累差獲室廬完地狎漁  
樵侶園供藜藿餐開門山落翠遶屋水流寒黃犢耕春陌朱  
花插曉欄疎籬穿皓月密竹覆清湍具酒鄰翁飲吟詩里塾  
看禪投元亮社傲寄子陵灘蹇步扶枵杖科頭挂籜冠餘生  
兵革外天地荷恩寬

古意

妾住西陵渡君家南浦邊春流將妾意日日到君前

夏子夜歌

儂愛北窗竹晝舒楚簟眠輕下葳蕤鑰不使歡來前

梅里詩輯

卷四

十四

雨淋鈴

至德中興日華清寂寞時上皇新度曲唯有舊臣知

子夜歌

願得縮地法千里如一鏡中容兩人面笑語時時並

望泰山

泰山突兀與雲連入望黃沙雜暮烟七十二泉何處瀉可憐  
不灌兗州田

宮怨

天街月色映河明御女踏歌笑有聲三十六宮通曲徑落花  
多處少人行

經過有感

金粉無春化作灰美人池館半青苔只今寂寞斜陽裏多少

東風燕子來

秦溪

秦溪斜日射秋蘋  
幾個閒鷗自作鄰  
沙斷柳深漁路狹  
野橋西去竟無人

紀事

漁陽烽火接甘泉  
司馬兵符午夜傳  
禁衛六軍爭索餉  
平明內府散金錢

登江樓

柳烟花浪漲錢塘  
飛閣春江對夕陽  
何事漁舟還汎汎  
一綸高坐白鷗鄉

重過陳處士山莊

桃榔小徑撥茶花  
五里桐坡引步斜  
何處寒龍吠如豹  
石門

梅里詩輯

卷四

五

山後魯朱家

端陽

烟淨風微渚水清  
龍舟羯鼓動哀聲  
祇今楚國無三戶  
還有遺民弔屈平

范路

路字遵甫一名澈  
友人私謚貞簡先生  
先世自蘭谿徙梅里有靈蘭館集

詩話隱君貧等黔婁和同柳下學仲茂叔節類伯鸞  
憂天下之憂樂筆歎之樂舍貞履信守道固窮常歲  
除大雪王布衣介人使人伺之方懸破席蔽風夫婦  
啜糠守歲遺以米五升不為嫌遭亂流離海上志不少  
活留之同飯糠粒不以為嫌遭亂流離海上志不少  
挫寔于理學多從方外游不為所惑嘗曰釋氏之學  
一了即為百了吾儒之學百了方為一了其詩不費  
銀鍊旨意懇惻情光炯然

秋婦思

有風自西來吹我庭前樹落葉飛如花滿我庭前路  
有風自西來吹我窗上紙簌簌終夜聲聽之弗可止  
有風自西來吹我牀上幃飄動竟長夜良人終不歸

短歌行

西望望江江長幾何東望望海海闊幾多浩浩蒼蒼匪濤則  
波眇彼細鱗孰測其濱得此涓滴實滿且湮豈無網罟曰非  
其辰

南山有白石

南山有白石煮之難療飢西山有青松摘之難爲衣飢寒誠  
莫禁去之道已非所以昔聖賢順受終弗違原巷出金石孔  
阮聞音徽素心竊追慕母違達者譏

讀史

梅里詩輯

卷四

六

智伯祀已殄趙氏勢方雄士苟欲富貴匍匐歸其宮飲頭諒  
不活殺身亦何功哀哉漆身人甘以殞厥躬乃知國士心不  
與世俗同寥寥數千載誰能嗣其風

井梧

深庭無別卉高梧蔽蒼穹月白滿階戶清陰搖窗櫳仙源沃  
其根片霞度寒空玉幹轉輾轡銀牀吸神虹凍雨急夜響先  
秋生商風鳳鳥待莫至義文道徒窮

感懷

夜定燈燼落孤生邁遙想歷物鮮所愜心形逝成兩蕙草日  
以摧榛莽日以長風雲道何窮羽翮悲失養擾擾泥塗中誰  
能事鞅掌

東南有丹壑卉木紛以秀中有餐霞人渺然脫塵垢罔雨不

敢窺山靈自呵佑願言從之遊道阻不可就安得乘雲車翩然在左右

少小弄機杼織成雙羅衣珍重不敢試願言當春暉歲華忽以逝良辰徒見違此製漸成古持此將安歸欲置不忍置默默雙淚垂

結交自童丱一朝成別離秋風吹古道露重霜葉飛留君苦不能從君道已違海闊波濤多山高鴻雁稀此衷竟安愬庶幾君來歸

初夏

日臥深庭中不識春已去強步臨空階紛紜滿飛絮初桐下輕陰暗竹達幽曙感此時物違怒焉起繁慮

感時

梅里詩輯

卷四

七

寒飈引朔厲萬彙蕭蕭瑟朱華萎霜霰芳芷歇阡術頽陽無暖情清商激悲律俯仰違中安躑躅悵顛軼眷眷候嘉辰義軫苦不疾安得有泰和輕蕙茁餘質

弃子行

長水夾大道往來多行人前者豐盛時冠蓋何鱗鱗值茲歲云歉踣躓皆流民餓婦抱弱子涕泣委水濱欲行不忍去踣顧還逡巡旣乃復爲乳含淚聲諄諄非我忍棄捐豈我不爾珍我今且垂斃焉能保爾身情愛苟不絕來世重相親言訖益大號悲風揚飛塵我行適見此慘悼傷心神

久雨

我心正悽惻淫雨在此時累旬不見天局踣無所之公苔上危墻中庭竟成池萍藻忽已生青青向檐楣鳴蛙從河來公

然在牀帷但得天氣晴東郊望耘耔

遠行篇

白雲在天際寒風吹遙林蕭瑟滿四野孤鞭指飛禽飛禽有時息我行歸未得上馬天甫明下馬旣昏黑眼前皆亂山所遇無相識思之復思之塗路何可極

感懷

朔風吹茂樹芳華散空籬良辰逝不永賤子悲涕洟往昔繁盛年歡樂誠無涯梁園茂賓從復道軒騎馳檐牙翼高房歌吹臨清池如何一朝盡富貴成塗泥時數會有極逐逐誠何爲

庭樹

庭中有芳樹好花參差開羨彼載飛鳥啾啾從東來東來集

梅里詩輯

卷四

六

我樹毛羽還自惜豈無名園枝樂此無彈射

洗心

飲酒須飲醴洗垢難洗心終然抱塵穢膏沐豈能任舜禹塗手足至今懷好音桀跖美蘭芷誰能信其深

夜坐懷唐上玉繆天自林耶聯句

獨坐燦清榮華光照纖悉囂訂旣云斂四壁起蕭瑟孤情渺難控良契隔遐室慧吟殊未忘曜靈迺奔軼芳軌信所希佳辰逝何疾良哉古人言寸陰抵兼鎰

業醫

末路感多難百懷何自鳴縑緇老歲月愁病空平生杖策旣無具著書悲未成目前徒食粟死後誰知名傳聞古黃帝垂術撫黎氓力補造化闕道通天地情金鼎鑄物命玉函藏妙

精忠武有賢智聿絲馳大聲壺公善變幻韓康隱市城丈夫  
苟失意何必非所營

夜坐

燒燈照深夜寂聽何淒清四壁蟲唧唧野鳥時一鳴百感從  
中來涕淚交縱橫花落有時發草枯還復榮日月如轉丸江  
漢滔滔行少壯不可得何以終平生

感歎

羲駕苦不留青陽逝何疾少小儼如昨去之安可卽造物爲  
蒼狗古賢亦荆棘昔聞安期生舉世無人識丹梯杳何在蓬  
瀛渺難極蜉蝣獨何爲翩翩振其翼

哭吳仲弼

仲弼名維鏗長余四歲天性友愛務簡靜以古道自  
任舊居構李城北十里余館其西園與爲爾汝交雞

梅里詩輯

卷四

十九

鳴風雨晴至篤也年來迹跡吾里足不出門戶竟以  
悒鬱死嗟乎以觀其志靈修擇畔之魂太傅長沙之  
歿何以異此余也旣蒙金契忍彼玉埋愧無雞炙之  
將爰效驢鳴之哭爾

戚戚復戚戚傷悼何時已與子相周旋屈指二十祀憶昔西  
角園更深弄碁子頰頰不肯休紅日麗窗紙君懷時正豪我  
頑亦伊始自後雖契闊中情仍密邇每見得握手殷勤問嘉  
祉念我久不見留我供酒盞燒燭拉羣從夜分話不止憐我  
不得志眷我如手指有飯輒欲推有衣輒欲被觀子意念中  
力薄恒自恥比歲戎馬興來居梅花里與我蓬蒿廬盈盈對  
一水我從遠方歸聞之甚欣喜喜我垂老人日夕晤知已不  
意居無何君言失和理對食卽不樂強之遂中瘖我謂此病  
脾扶之當卽起不謂數日間言君忽已死嗚呼其夢與如何  
竟真是嗟彼蒼者天善人願如此堂上雙白髮身後無嬌體

縱我金石心能禁淚如此

自傷

上有紅桃花下有碧流水一朝風相吹桃花忽相委嗟我飄泊人所傷亦如此

春日寄屠闔伯海昌

前年同走剡山道古木危崖共相保去年我獨行海濱遠水長天隔青草不意君今復遠違春風發棹未能歸桃花滿樹不同看柳絮濛濛自各飛我思百年亦徒爾曾見幾人能不死潘岳閒居鬢忽絲屈原一去魂招紙古人秉燭豈無謂世事茫茫况如此逐逐風塵與息機清夜思之孰爲是何日翻然共卜居輞川鹿柴浣花渠門前齊養千樹橘池裏還栽徑尺魚良辰曳杖更攜酒醉後仰天酣說書君養老母我完葬梅里詩輯

卷四

三

懷祝獻虞諸昆從

去年下席龍山東週末封胡意氣濃攜尊或坐梧桐月散髮仍吟楊柳風此景依依儼如昨水雲儻忽人還各魚鴈無憑音信稀相思不耐燈花落幾回欲放子猷船咫尺風塵悲遠天伊水祇看烟渺渺蒹葭空見月娟娟蒹葭伊水情堪感地北天南長寂寂一夜西風偏別離贏得朝來頭盡白

戊子初度賦

戊

頭髮絲絲形已叟問我年今三十九前此拮据竟何成惟有仰天拍素手老妻索米耳欲穿幼兒弱女嗷膝前自嘆一家五口尚不活安有才力謀世間君不見東鄰野老子蚤田收穠晚田種濁酒如泉穀滿場足跡未嘗到城市天平我生但

得如此人不羨王喬長不死

悲歌

年過四十驚飄忽萬事蹉跎向衰疾只見青春挂綠楊那有黃金買白日揚馬文章詎足論尙平婚嫁復何云鏡中雙髮不相待請君試看北邙墳

曉泛

曙色開平野餘星散遠川櫂迴帆影白霞落水紋鮮海日遙同赭山城斷若烟錢塘潮正悍慷慨欲鳴臈

題薛道士房

仙閣臨長水閒眠愛竹牀魚觀濠上樂酒合鑑湖狂五夜燒鈔白三秋鍊棗黃服行知己久看取兩瞳方

寄夏季思

梅里詩輯

卷四

三

盈盈衣帶水迴首卽天涯未減三年字重開二月花黃公終入漢范叔更無家自媿飄蓬極相看鬢已華

海畔

海畔從憑眺蒼茫萬里愁暮潮驅積雪霜樹染深秋世事悲雙鬢仙遊想十洲飄零無處所羨爾一沙鷗

送友人歸蜀

秋色滿天地於茲一送行可憐多病日重以別離情萬里看秦峽孤舟出楚城再來知健否惆悵不能平

遠歸

三徑重歸日蓬蒿未翦除依然王粲井深閉子雲居沈醉非關酒銷愁豈是書惟應高臥處清夢遶華胥

孤村

孤村流水外緩步自東皋返照迎殘笛輕風入敝袍柴門漁網下麥隴雉媒高欲問桃源路垂楊繫小舸

夏日閒居

江上吾初返風波此倦游亂離方昨日衰病復何求藥圃栽蒼朮蓮塘對白鷗不須重解脫久識此生浮

養拙今何事天年貴不材離奇人所棄得喪我無哀谷口尋僧去花間看鳥回西山多爽氣遙對夕陽開

空庭靜白日卽此是山家叢竹深三徑閒心罷五車門垂徵士柳盤設故俟瓜旦夕池亭上芙蓉徧好花

經旬成獨步徒倚出柴扉山果風前落園蔬雨後肥遠洲通放櫂新月照披衣隔水長歌發何人賦采薇

晏坐絕諸勞蕭條慕隱君遠風當牖入驟雨隔簾聞漉酒陶

梅里詩輯

卷四

三

元亮鉤玄揚子雲寥寥千載後誰復是同羣

桐廬曉發

千林開宿霧一櫂發朝暉遠水玉爲面春花作衣灘聲連日動檣影逐雲低迢遞蘭江路羣鴉不住飛

夜泊富春城下

富春尋旅泊城下水湯湯畫角悲中夜危樓接大荒野雲蒸鬼哭山火炙林黃徧聽鄰舟語無人不異鄉

夜泊蘭江

已入蘭陰道猶眠灘上舟岸雲依樹歇山月帶江流遠火明沙際清歌起渡頭無從沾舊酒一夜重離憂

靈鷲山夜眺

憑高望無際微月澹秋陰山走川原遠海涵星漢深離憂驚

楚服久客廢吳吟不聽嘒螢急安知游子心

晚步

氣侵林木晚歸步自原田舊業愁中盡餘生亂後全人烟孤壘斷衰草夕陽連何處悲筇動依然似去年

同周青士觀瀾庵夜歸

薄暮虎谿約步來同叩關花開當古佛人靜若空山鉢洗階前水風吟錫上環不愁歸路黑好共月明還

晚望感懷

暝色生虛壁餘光下綠苔春城低六鳥雲樹沒層臺吹角江天近鳴榔楚水開孤烟空外直匹馬日邊來澤畔吟誠苦山陽笛可哀袁宏今已老誰復北征才

哭五弟賓王

梅里詩輯

卷四

三

兵戈憶昔送離亭滿日秋風痛脊令一去關河成隔世再回桑梓只空庭蛩吟野蔓霜花白淚落寒牀火氣青此際相思更何盡不堪孑鬢已如星

得晤屠闇伯姚江

勾章此日歡相見卻憶春時別劍中殘雪滿衣人拂淚蒼山一路鳥呼風韶光忽逐流雲變強健猶看舊日同不惜深更話鄉國近來能得幾書通

一邱山遠望

巖岫林木響西風獨立懸崖望不窮白浪秋高漁艇沒黃茅霜老野花空松門曉闢扶桑日雲漢寒飛絕塞鴻更欲乘虛汎天未萬山開處一孤篷

屠昭仲云此遊甫蹈海作也

一邱山院得主人吳君佐夜邀從山塗暗行二十里

山院黃昏政寂寥，感君仗劍獨相邀。荒烟暗盡來時路，漁火明隨去後潮。林下時時逢石虎，樹頭隱隱出山魈。柴門冥漠知何處，約畧曾過舊竹橋。

一 邛山感懷

仄徑荒茅覆短松，蕭蕭萬壑斷行蹤。故鄉極目橫飛鴈，滄海何年起臥龍。靖節有懷悲屈已，嗣宗無路哭填胸。西風寂寞誰相弔，古寺斜陽出晚鐘。

客步

厯落關河徹黑貂，北風驅雨鬪迴潮。平沙晚落蘆花雁，古樹寒剝柏子樵。歸犢自依村口入，野航猶向渡頭招。緜袍此日還誰贈，歲暮天涯倍寂寥。

妙峯庵中作

梅里詩輯

卷四

五

絕壁高懸下朔風，蕭條萬木此俱空。窗浮漲海來虛白，門瀉寒泉汎落紅。五夜猿聲催客淚，百年僧臘老玄功。飄蓬歲暮愁無極，欲把無生問遠公。

東甌晤別陸麗京

時陸將適閩  
余有歸計

名州康樂舊豪華，奢旅舍相逢政永嘉。把盞共邀華頂月，甌城有華蓋山館登樓問賦赤城霞。榕陰千里君行遠，萍跡三年我恨于其下。離歌重分手，不知相見更誰家。

別沈傳中

海嶼蒼蒼接浪雲，汀沙飛雨不堪聞。去年傾蓋逢知己，此日離亭又別君。千里冰霜寒范叔，六朝詞賦重休文。相思自後分南北，回首秋風雁一羣。

遙經郡城作

汎

同

愁雲里霧壓城頭丁令重來幾隔秋折戟尙沈沙口鐵殘陽  
空照水邊樓風吹牧馬千羣出浪打寒塘百道流未到新亭  
腸已絕何須極目望神州

錢允武云地回風瑟天朗氣清

秋日尋楊聖遊不得

秋入橫塘訪舊遊伊人宛在思悠悠黃花自遶揚雄宅綠水  
空移范蠡舟敢向衡門題鳳字更於何處問羊裘無聊已盡  
山陰興寒月蒼蒼滿渡頭

春遊曲

車圍繡幃馬銜鑣載取鈿箏間玉簫欲試誰家新釀好東風  
楊柳第三橋

冬日古南夜話

古南十月夜初長華燭搖光照小堂話久不知鐘磬徹坐看

梅里詩輯卷四

三

花雨落藤牀

朱孝廉爲吳祭酒高足弟子遭時離亂感喟極深故其  
爲詩沉着悲涼音激金石置之梅村集中幾莫能辨大  
府辟之不就介石之操當仁不讓其與祭酒論詩云至  
今低頭甘伏櫪豈同凡馬受羈轡殆隱有以諷歎孝廉  
又有梅里詞三卷范貞簡靈蘭館集僅二卷其哭吳仲  
毀哭弟賓王詩具見至情孫瀚識



